

DISSERTATIO  
HYDRAULICO-MEDICA,  
DE  
SANGUINIS CIRCULATIONE;  
*QUAM, DEO-DUCE,*

IN celeberrimo Monspeliensi Lycæo, publicè rueri  
conabitur, AUTHOR JOANNES-ANTONIUS  
BUTINI, GENEVENSIS; Artium Liberalium Ma-  
gister, & Medicinæ Alumnus; Die mensis  
Mart. 1746, ab octavâ ad meridiem.

*Pro Baccalaureatu consequendo.*



MONSPELII,  
Apud JOANNEM MARTEL, Regis & Universitatis  
Typographum.

---

M. DCC. XLVI.



R. R. D. D.

## PROFESSORES REGII.

Illustrissim. D. D. FRANCISCUS CHICOYNEAU,  
Cancellarius & Judex, Regi à Secretioribus Con-  
siliis, Archiatrorum Comes.

### DISPUTATURI.

R. D. PETRUS RIDEUX, Decanus.

R. D. ANTONIUS MAGNOL.

R. D. HENRICUS HAGUENOT.

R. D. JACOBUS LAZERME.

R. D. GERARDUS FITZ-GERALD.

R. D. EUSTACHIUS MARCOT, Regis Me-  
dicus perpetuò ordinarius.

R. D. ANTONIUS FIZES.

R. D. FRANCISCUS DE SAUVAGES.

### DOCTORES ORDINARII.

D. CAROLUS SERANE.

D. FRANCISCUS COMBALUZIER.

D. FRANCISCUS LAMURE.

D. ANTONIUS TANDON.

D. THEOPHILUS BORDEU.

D. JOSEPHUS DEMARCO.

D. FRANCISCUS IMBERT.

D. ANTONIUS BERTHOMIEU.



VIRIS VIRTUTE VENERANDIS,  
DOCTRINA ADMIRANDIS,  
MORUM SUAVITATE AMABILIBUS,  
IN ALMA GENEVENSI ACADEMIA  
PROFESSORIBUS CELEBERRIMIS:

AMADEO DE LA RIVE,  
RECTORI, PHILOSOPHIÆ PROFESSORI;

AMADEO LULLIN,  
HISTORIÆ ECCLESIASTICÆ PROFESSORI;

CAROLO-FRIDERIC. NECKER,  
JURIS PUBLICI PROFESSORI;

JOANN. LUD. CALANDRINI,  
PHILOSOPHIÆ PROFESSORI;

GABRIELI CRAMER,  
MATHESIOS ET PHILOSOPHIÆ PROFESSORI;

JOANNI JALLABERT,  
PHILOS. EXPERIMENT. ET MATHES. PROFESS.

FAUTORIBUS AC PRÆCEPTORIBUS SUIS,

PHYSIOLOGICUM OPUSCULUM STUDIORUM PRIMITIAS  
GRATUS DEVOTUSQUE CONSECRAT.

JOANNES-ANTONIUS BUTINI.



SPECTATISSIMO VIRO  
JACOBO VERNET,  
IN ACADEMIA GENEVENSI  
HUMANIORUM LITTERARUM  
AC HISTORIÆ CIVIL. PROFESSORI CELEBERRIMO,  
SUOQUE AFFINI CHARISSIMO,  
PATHOLOGICUM OPUSCULUM  
CONSECRANDO,

S. P. D.

JOANNES-ANTONIUS BUTINI.

**C**UI omnia debeo nihilque par rependere possum, gratum  
saltem animum publice testari ut justum ita jucundissimum  
est. Me in teneriori adhuc ætate optimis Parentibus orbem do-  
mu tuâ excepisti, instituisti, pro filio habuisti. Ibi prima Scien-  
tiarum accepi elementa, quodque majus Virtutis principia se-  
dulò instillata habui, continuisque exemplis confirmata. Docuis-  
ti præcipuè Medicum Virum non sibi sed suis Civibus, maxime  
verò Pauperibus natum. Si igitur in posterum, quod in votis  
semper intimis fuit, nonnihil etiam in commune Patria bonum  
à nostris studiis redundet, id totum in te refundendum esse Men-  
torem & Præceptorem benignissimum palàm hodiè profiteor. Diu  
te Civitati sospitem ac incolumem servet Deus, operamque tuam  
in rei Christianæ simul ac litterariæ incrementum foveat, æter-  
nâque mercede remuneret. Vale.

Dabam Monspelii Kal. Mart. ann. M.DCC. XLVI.





## PROEMIUM.

**D**UM omnes scientiæ, excusso auctoritatis jugo, à recentioribus Philosophis de novo excultæ, miris undiquè inventis illustrarentur; sua & Medicinæ affulsit lux, ex promulgatâ per sagacissimum Harveyum Sanguinis Circulatione, indèque Medicæ Theoriæ immutata prorsus facies. Dein alterâ quasi vice perfectis ulterius per Mathesin Scientiis Physicis, illustrandam iterum fore animalem œconomiam ut mechanicæ partem videbatur. Tandem adeò miris in Hydrodynamicâ progressibus factis, humanam machinam quoad vitales functiones verè hydraulicam, jam ad intima usque penetralia cognoscendam sperabant omnes. Hucusque tamen eventus expectationi non respondit: nec mirum videbitur operis difficultatem seriò perpendenti; de machinâ enim novi prorsus generis hîc agitur, partim corporeâ, partimque spiritali, multa quidem cum reliquis communia sed alia quædam sibi propria habente: hinc summâ cautione opus est in principiorum mechanica simplicis applicatione, & in turpissimos errores inexplicabilemque confusionem illapsi sunt qui cum Cartesio hominem ut mere corporeum perpetuique motûs exemplar considerant. Quædam tantum principia feliciter jam applicata hinc inde sparsa reperiuntur: quæ in unum corpus colligere & generali circulationis nexu connectere operæ pretium visum est; omissis Auctorum locis, è quibus omnia de promptu, numerosiores enim sunt, eruditisque notissimi. Ne autem stricti Dissertationculæ limites nimium removerentur, organorum circulationi inservientium descriptionem juxta celebrem Winslow notam supponimus, ut & circulationis demonstrationem nullibi melius quàm in ipsius illustrissimi Harvey exercitationibus traditam.



# ORDO.

## PARS I.

### **D**E Sanguinis Circulatione in statu sano.

ART. I. De velocitate Sanguinis in diversis alvei locis.

ART. II. De vi Sanguinis in diversis alvei locis.

ART. III. De pressione Sanguinis laterali.

ART. IV. De circulatione à sinistro Cordis ventriculo ad dextrum generali.

ART. V. De circulatione à dextro ventriculo ad sinistrum trans Pulmones.

ART. VI. De motibus circulatoriis absolutis computationes.

ART. VII. De Potentiâ motricè.

ART. VIII. De Sanguine physicè considerato.

ART. IX. De calore Animalium.

ART. X. De circulatione in Fœtu.

## PARS II.

### **D**E Sanguinis Circulatione in statu morbofo.

ART. I. De Sanguinis vitiis in copiâ & consistentiâ.

ART. II. De robore vasorum aucto & imminuto.

ART. III. De circulatione inequali & humorum raptu ad certas partes.

ART. IV. De Hemorrhagiis naturalibus.

ART. V. De Hemorrhagiis artificialibus, speciatim de Venæ sectione.


ART. VI. De Obstructione & Inflammatione.

ART. VII. De Febre.

ART. VIII. De Cordis palpitatione.

ART. IX. De Pulsibus.

ART. X. De Syncope & morte.



# DISSERTATIO

## HYDRAULICO-MEDICA,

### DE

## SANGUINIS CIRCULATIONE.

---

### PARS I.

#### *De Sanguinis Circulatione in statu sano.*

**R**ECENTIORIBUS Philosophis receptus mos est, ut in tractationibus Mathematico-Physicis res in statu quodam præcisionis imaginario considerent, abstractione factâ ab externis circumstantiis ipsorum conclusiones firmioribus innixas principiis parùm immutantibus; Hinc etenim proportionibus motuum mirè regulares eruuntur, quæ faciliè tamen si necesse sit ad statum naturalem, satis accuratè revocari possunt ut error Physicus nullus irrepât. Tandem hic sequemur methodum, simulque ne diversis objectis attentio nimium distrahatur Sanguinis motum circulatorium in tres considerationes decomponimus, velocitatem in primâ, vim in secundâ, lateralem pressionem in tertiâ perpendentes. Quæ omnia in quarto deinceps articulo ad unum conspectum reducentur.

#### ART. I. *De velocitate Sanguinis in diversis alvei locis.*

##### *Principia hydraulica.*

1. Sit vas quodcumque inflexile A B, quod tranet fluidum incom- Fig. 1. 2. 3.  
A ij



pressibile ab unâ parte A impulsus versùs aliam B ita ut nullum datur vacuum inter vasis parietes & fluidum. Quantitates fluidi per diversas sectiones A, c, c, in alveo toto effictas eodem tempore tranantis erunt æquales. *Demonstr.* Evidens est enim quod si per sectionem A promoveatur v. g. pollex cubicus fluidi, progredi non potest quin per aliam quamcumque directam vel obliquam c, c, eodem tempore tranet etiam pollex cubicus fluidi compressionem non patientis, nec vas dilatare valentis.

*Fig. 2.* 2. Iisdem positis si ita concipiatur sectio quælibet ut in omnibus ejusdem punctis fluidi velocitas sit eadem, velocitates fluidi per diversas hæc sectiones transeuntis erunt alvei sectionibus reciprocè proportionales. *Demonstr.* Dùm enim fluidum transit per sectionem fictam potest concipi ut formans solidum cujus basis est sectio ipsa & longitudo repræsentat velocitatem communem fluidi tranantis. Sed omnia hæc solida sunt inter se æqualia (1) ergò altitudines sunt basibus reciprocè proportionales,  $i : e : \text{Velocitates, \&c.}$

*Fig. 3.* 3. Si verò assumeretur sectio talis ut velocitates in diversis punctis (a & b) diversæ essent, non una esset solidi altitudo, propositioque secunda non posset applicari.

4. Si sectiones sint ubique æquales ut in prismo & cylindro, velocitates erunt ubique æquales. Si verò sectiones continuo crescant aut decrescant ut in cono, certisque tubis ramosis, tunc velocitates pari passu decrescant in crescentibus, crescant in decrescantibus vasis.

#### *Velocitas relativa in Venis.*

5. Venæ quidem sunt canales molles & flexiles, undè ad certum gradum à sanguine tranante distenduntur, sed ubi semel vis distendens in æquilibrio est cum earum vi renitente in eodem statu distensionis manent, idèmq; præstant ac inflexiles tubi, Hoc autem æquilibrio de facto in ipsis observatur.

6. Sanguis non est compressibilis circulationis viribus, nam intrà clausum tubum sub eodem caloris gradu viribus etiam majoribus ad minus spatium redigi nequit.

7. Ab extremis ad Cor per venas Sanguis continuo movetur ex ramulis venosis in truncos semper pauciores, donec omnes tandem in venas cavas desinant, possumusque illum considerare ut per innumeros embolos pulsum ab unâ parte versùs aliam à ramis in truncos.

8. Nullum etiam datur vacuum inter venarum parietes & sanguinem contentum, quod si posset dari statim per elasticitatem venæ, aërisque



5

ambientis pressionem destrueretur.

9. Venæ igitur constituunt vas inflexile, intra quod movetur incompressibile fluidum nempe Sanguis, ab unâ parte versûs aliam, ita ut nullum sit vacuum inter ipsius parietes & fluidum contentum. Ergò si in illis tales fingamus sectiones ut in unâquaque velocitas Sanguinis sit uniformis, erunt velocitates alvei totius sectionibus reciprocæ. (2)

10. Ex mensuris autem constat quod ramulorum simul sumptorum sectio major sit sectione ramorum, quæ iterum major est truncorum sectione: uno verbo, minui continuo alvei venosi capacitatem ab extremis ad Cor. Undè certò evincitur velocitatem Sanguinis venosi continuo crescere ab extremis versûs Cor, ita ut minima sit initio venularum, media in ramis, maxima in truncis propè Cor.

11. Quæretur forsan quomodo possint determinari tales sectiones, ut velocitas in unaquâque sit uniformis, quod hucusque supposuimus. Hoc præcisè determinare difficillimum est in ramosis tubis corporis nostri, cum diversa sit resistentia & vis pellens etiam in ramis à Corde æquidistantibus ut inferiùs dicetur & consequenter diversa velocitas. Sed cum hic accurata computatio non requiratur, nullo modo ex his subtilioribus differentiis veritas Propositionis nostræ principalis (10) infringetur.

12. Imò cum Propositioni nonæ sufficiat veritas physica, si determinatio relationis velocitatum specialior requiratur, satis erit sectionem instituere in truncis, ramis, ramulisque ejusdem ordinis seu divisionis, qui sint omnes v. g. primæ bifurcationis, vel secundæ, vel tertiæ, ut vulgò fit in idgenus computationibus.

13. Determinatâ semel velocitatè Sanguinis absolutâ in unâ alvei venosi sectione, & cognitâ ipsius ad alias ratione, nunc clarè patet per inversam proportionem velocitatem absolutam in aliis etiam facilè fore determinandam.

### *Principia hydraulica.*

14. Iisdem positis ac in §. 1. 2. sit tantum vas dilatabile cujus *ampliationes* sint in omnibus sectionibus æquales, patet quod in cylindro tranantis fluidi velocitates erunt semper ubique æquales, non secus ac si inflexilis foret.

15. In tubo decrescente, cum in quolibet instanti indefinitè parvo possit pro inflexili haberi ob infinitè parvam dilatationem, eadem lex observabitur, erunt nempe velocitates sectionibus reciprocæ. Si verò ob sectionum rationem continuo variabilem conferatur velocitatum ratio in tubo dilatabili cum eadem in simili tubo inflexili manente, cum major fiat proportionaliter dilatio quò minor est sectio, evidens est



quod proportionaliter magis imminuatur per dilatationem velocitas in minori sectione quàm in majori, undè minori crescunt ratione velocitates in tubo decrescente dum dilatatur ubique æqualiter, quàm in eodem inflexibili manente.

16. In crescente autem dilatabili tubo, minori proportionem decrescet velocitas quàm si fuisset inflexibilis ut per rationem contrariorum patet.

*Velocitas relativa in Arteriis in ipsarum diastole.*

17. Cor contractionem suam incipiens Sanguinem in arterias tunc contractas, emboli instar ab Arteriarum trunco versùs ramos propellit. Cum verò propter affrictum lateraliter premat Sanguis vi resistantiam Arteriarum superante, earum tunicas dilatabit. Ergo tempore suæ Diastoles, Arteriæ sunt vasa dilatabilia & *ampliationem* patientia.

18. Ut autem *ampliationis* hujus quantitas æstimetur, observandum est eam esse differentiam sectionis seu aperturæ maximæ & minimæ Arteriarum in summâ ipsarum Diastole & in summâ Systole. Ita ut sub eâdem Systole, si augeatur Diastole vel Arteriæ sectio maxima, *ampliatio* aucta erit. Sub eâdem Diastole, si augeatur Systole vel imminuatur sectio Arteriæ minima, *ampliatio* etiam augebitur. Sed si dum intenditur Diastole pari passu imminuatur Systole, eadem persistabit *ampliatio*. Quod reverâ in arteriis accidit positâ eâdem vi Cordis impellente, eâdemque Sanguinis indole. Tunc enim sectionum Arteriæ in Diastole & in Systole magnitudo à duabus unicè causis pendet. 1<sup>o</sup>. A laxitate tunicarum vasis. 2<sup>o</sup>. A resistantiâ antecedentis fluidi. In variatione autem illarum causarum, si ex unâ parte augeatur Arteriæ maxima sectio in dilatatione, necessariò tantundem augetur minima in contractione & vice versâ; undè eadem semper *ampliatio* manebit. Sic quodcumque fuerit cæteris paribus tunicarum robur in uno loco, exindè non mutabitur ibidem *ampliatio* vasis; si enim v. g. duplò fortiores evadant fibræ, exindè quidem minùs elongabuntur in dilatatione, sed cum eâdem proportionem altiùs contrahantur in contractione, eadem servabitur *ampliatio*. Si etiam cæteris paribus augeatur resistantia fluidi antecedentis, exindè quidem contractionis altitudo imminuetur, sed cum lateralis pressio pari passu augeatur in hoc casu ( ut infrâ videbimus ) quàm resistantia antecedentis fluidi, eâdem proportionem augebitur dilatatio, eademque *ampliatio* remanebit.

19. Rectè igitur statuimus quòd etiamsi pressio lateralis & vasorum robur continuò à Corde versùs extrema decrescant, *ampliatio* tamen fiat semper in omnibus totius alvei arteriosi sectionibus æqualis.



20. Arteriæ per truncos à Corde ortæ versùs extrema progrediendo dividuntur in ramos ramulosque continuò minores donec tandem ad Venularum orificia terminentur. Docent autem mensuræ trunci sectionem minorem esse sectione ramorum, quæ iterùm ramulorum simul sumptorum sectione minor est, ita ut arteriolus alveus continuò augeatur à Corde versùs extrema.

21. Undè concluditur quod velocitas Sanguinis per Arterias tempore ipsarum Diastoles moti decrescat semper à Corde versùs extrema, ita ut maxima sit propè Cor, media in ramis, minima in ultimis arteriis. Minus ramen decrescit quàm sectiones ampliantur, mensuris in Arteriarum contractione sumptis.

### *Principia hydraulica.*

22. Nunc supponatur cæteris paribus (1) vas contractile fluido plenum, altero sui extremo obturatum sese contrahere, & *imminutiones* sint in omnibus sectionibus æquales, quantitates fluidi per diversas sectiones eodem tempore transeuntis, crescent ut distantia sectionum ab obturaculo. *Demonstr.* Si enim totus alveus dividatur in portiunculas æqualis longitudinis, spatiola per uniuscujusque contractionem evanescentia, seu quantitates fluidi ab unoquoque expressæ, æquales semper erunt. Crescent igitur ut numerus portiuncularum, seu quia sunt ejusdem omnes longitudinis ut distantia ab obturaculo.

23. Velocitas autem fluidi in sectionibus diversis, erit semper in ratione compositâ ex directâ quantitatis tranantis & inversâ sectionis. Itaque in cylindrico tubo ubi sectio ubique æqualis est, crescet velocitas ut moles transfluens, sive ut distantia ab obturaculo.

24. Si verò alveus crescat, juxta proportionem incrementi ad distantiam ab obturaculo diversa erit fluidi velocitas; eadem nempe in toto alveo si crescant sectiones ut distantia, continuò aucta si minori ratione crescant sectiones, continuò imminuta si majori ut in vasibus conicis.

### *Velocitas relativa in Arteriis in ipsarum Systole.*

25. Tempore relaxationis Cordis Arteriæ Sanguine turgentes contrahuntur, valvulisque semilunaribus ad invicem applicatis obturatur canalis ab uno extremo nempe trunco, propelliturque Sanguis versùs ramos.

26. Arteriosus alveus eodem tempore in omnibus suis punctis contrahitur docente observatione, & redit ad eandem contractionem quam initio dilatationis habebat in statu permanente, ita ut eadem percurrantur spatia à tunicis & in contractione & in dilatatione, seu *immi-*



*nutio* alvei arteriosi in systole æqualis est ipsius *ampliationi* in Dia-  
stole; sed erat hæc *ampliatio* in omnibus totius alvei sectionibus æqualis  
(19) ergò etiam æqualis fit in omnibus sectionibus *imminutio*.

27. Si arteriosi alvei capacitas primò minùs dein magis quàm in ra-  
tione distantiarum crescat, ut autopsia & mensuræ suadent, in mayo-  
ribus truncis crescit Sanguinis velocitas in Arteriarum Systole, verùm  
in minoribus ramis continuò ut in Diastole imminuitur. (24).

### *Corollarium generale.*

28. Ex suprà positis constat, quod in venis semper velocitates San-  
guinis sint alvei sectionibus reciprocæ: In Arteriis tempore ipsarum  
Diaستoles, minuatür continuò velocitas in minori ratione quàm sectio-  
num amplitudinis. Temporeque Systoles Arteriarum, velocitas Sangu-  
inis in ipsis à corde crescit ad certos usque ramos è quibus ad venu-  
las usque ut in Diaستole decrescit. (9. 21. 27.)

## ART. II. *De vi Sanguinis in diversis alvei locis.*

### *Principia hydraulica.*

29. Fluidorum tubos tranantium vires, sunt in quâlibet alvei sectio-  
ne, in ratione compositâ ex velocitate & mole fluidi sectionem liberè,  
i. e. sublatâ omni antecedente resistentiâ, tranantis.

30. Sunt ergò vires proportionales quadrato molis dato tempore ef-  
fluentis per sectionem diviso. Nam si sit moles  $m$ , & sectio  $s$ , veloci-  
tas erit  $m:s$ , & consequenter vis  $mm:s$ .

31. Vis fluidi per embolum propulsi tubumque accuratè replentis,  
continuò per affrictum juxtâ vasis superficiem in progressu minuitur.  
Quò major igitur erit vasis interna superficies sub eâdem capacitate,  
eò major erit vis deperditio.

32. Supponatur vas cylindricum per sectiones ita dividi, ut spatia  
inter binas semper æqualia sint, manifestum est quod ob æquales sem-  
per spatii cujusque superficies, & consequenter æqualem affrictum, de-  
perditio vis crescet ut sectionum numerus; superiori deperditioni in præ-  
cedentibus spatiis factæ uno semper gradu in quâvis sectione addito.

33. In alveo autem ramoso crescente, per sectiones eâdem lege ins-  
titutas diviso, si in quâvis bifurcatione ramus uterque trunco sit æqua-  
lis, eodem modo crescet vis deperditio: eadem enim erit superficies in  
quolibet spatiolo, sive in trunco sive in ramis. Nam spatiolorum CD,  
Fig. 4. EF inter duas sectiones inclusorum, utrumque perfectè simile est di-  
midio



midio spatii AB in trunco, & æqualem habet superficiem.

34. Sed si uno non mutato ramorum alter trunco sit angustior, augebitur spatii superficies; dum enim cavitas decrescit ut quadratum diametri, circumferentia decrescit tantum ut diameter. Augebitur adhuc magis si uterque ramus imminuatur, & in hoc casu deperditio vis ex affricu magis crescet quam sectionum numerus, & eò magis quò frequentiores erunt similes bifurcationes.

### *Vis Sanguinis in Arteriis in ipsarum Diastole.*

35. Cor in suâ contractione Sanguini arterioso certam vim seu motus quantitatem communicat, quam integram antecedenti communicare non potest, ob affricum quo aliqua ejus portio absumitur. Inde continuo minuitur hæc Sanguinis vis versus extrema progrediendo. Et eò quidem magis quod arteriæ in ingentem numerum ramorum dividantur, truncis minorum, quorum ultimi minimi sunt maximoque attritui locum dant.

36. Sed ut idea hujus virium decrementi accuratior tradatur, fingamus transversim secari ramulos omnes arteriosos Sanguinemque per unam Arteriarum Diastolem effluentem ponderari: tum secetur aortæ truncus propè Cor & Sanguinis æquali tempore projecti mensura pariter asservetur: evidens est quod multò major erit istius copia, nam dum Sanguis è ramulis effluxit æqualis ipsi quantitas aortam integram adhuc tranabat, sed liberè non effluens ob antecedentem molem, quâ per sectionem sublata majori multò copiâ effunderetur. Verum præterea assumendum est utriusque ponderis quadratum, undè longè major enascitur ratio, & ut totum absolvas divide utrumque numerum per sectionem respectivam, majorem nempe per aortæ sectionem, minorem per omnium ramorum simul sumptorum amplitudinem; undè minima prorsus erit vis Sanguinis in ultimis ramulis etiam omnibus ad ipsius vim propè Cor.

### *Principia hydraulica.*

37. In alveo continuo decrecente, vis fluidi in diversis sectionibus, ipsarum amplitudini proportionalis est; decrescit igitur in ratione decrementi alvei, affricu etiam neglecto. *Demonstr.* Docet enim Hydrostatica, fluidorum pressionem seu vim esse in ratione basis & altitudinis; si ergo altitudo eadem est, seu quod eodem redit si embolus vi semper eadem impellatur, vis erit ut basis sive in nostro casu ut orificium vel sectio.

38. Inde sequitur quod in tali vase eadem est in sectionibus omnibus



fluido liberè transfluente velocitas. Si enim major esset in unâ, vis in eâ major foret quàm pro sectionis ratione contrà suppositum. Experimentis hæc confirmantur.

*Vis Sanguinis in Venis.*

39. Venæ sunt alveus continuò decrescens ab extremis versùs Cor; ergo vis Sanguinis per eas moti decrescit in ratione sectionum: est itaque vis Sanguinis in venulis ad ipsius vim in cavis, ut sectio venularum omnium ad cavæ ipsarum trunci sectionem.

40. Affrictus autem nonnihil adhuc hanc virium deperditionem auget, parum tamen nam continuò imminuitur, fluido ex strictioribus ramis in capaciores truncos tranante; quod patet ex præcedentibus.

41. Longè minor fit virium Sanguinis deperditio in transitu per Venas quàm per Arterias, in quibus ratio decrementi augetur insuper in quadratorum quantitatum effluentium ratione. (36.)

*Principia hydraulica.*

42. Sit vas crescens contractile, fluidum exprimens per contractionem in omnibus sectionibus æqualem, crescet vis fluidi tranantis, uno extremo obturato, in multò minori ratione quàm distantia ab obturaculo. *Demonstr.* Divisus concipiatur alveus in portiunculas æqualis longitudinis: fluidum per contractionem unius tantùm portiunculæ expressum, movet totam antecedentis fluidi molem cum quâdam velocitate, eò minori quò portiuncula contracta remotior est ab obturaculo ob sectionem ampliata eandemque per quamlibet portiunculam expressam molem. Minor est simul movenda fluidi moles, unde duplici ratione tum molis tum velocitatis minorum vis erit minor quò portiuncula contracta fuerit ab obturaculo remotior. Vis igitur quam cujuscunque portiunculæ contractio fluido communicat continuò minuitur, unde crescit vis totalis fluidi ex additione harum omnium partialium confecta, multò minus quàm portiuncularum numerus, seu cum omnes sint ejusdem longitudinis, multò minus quam distantia ab obturaculo.

*Vis Sanguinis in Arteriis in ipsarum Systole.*

43. Arteriæ formant alveum crescentem contractione suâ in omnibus sectionibus æquali fluidum exprimentem, ut prius diximus (26) ergo in ipsis, contractionis tempore, vis Sanguinis continuò à corde versùs extrema augetur, sed multò minori ratione quàm distantie à Corde. Si verò affrictus etiam ratio habeatur, imminuetur adhuc multum hæc



proportio sed difficillimè ad aliquam computationem revocari posset, nec operæ pretium.

*Corollarium generale.*

44. Ex suprâ dictis constat, quod tempore Diaستoles Arteriarum vis Sanguinis maxima sit in aortâ propè Cor, continuòque per ramos decrescat & in magnâ quidem proportionè: indè ex venulis continuò iterum decrescat usque ad cavas, sed ratione multò minori, tempore verò Systoles Arteriarum vis Sanguinis parva est in aortâ propè Cor, parùm augetur usque ad extremas arteriolas; (ubi eadem est ac priùs ibidem in Arteriarum Diaستole, ut jam jam demonstraturi sumus; ) indeque per Venas decrescit eâdem prorsùs ratione ac tempore Diaستoles Arteriarum.

ART. III. *De pressione Sanguinis laterali.*

*Principia hydraulica.*

45. Si fluido trans tubum moto talis opponatur resistentia ut progredi nequeat, latera tubi prementur vi totali fluidi. Tunc enim quiescet fluidum, cumque docente Hydrostaticâ æqualiter premat in omnem sensum, latera eâdem vi prementur ac obstaculum, i. e. vi fluidi totali.

46. Si nulla fluido opponatur resistentia, v. g. si in tubo cylindrico sine affrictu moveatur, ita ut fluidi lamellæ axi perpendiculares æquali velocitate procedant, sibi semper parallelæ, nulla erit inter ipsas pressio nec ad latera refluxus, nulla pressio lateralis.

47. Sed si antecedentes minori procedant velocitate, tunc à consequentibus prementur, cumque fluidi pressio in omnem communicetur sensum, vasis parietes comprimuntur eâdem vi quàm lamellæ antecedentes, quâ determinatâ, lateralis pressio cognoscetur.

48. Moveatur fluidum trans cylindricum tubum NO, in quo immissarium N majus est emissario O, in datâ ratione  $n:1$  velocitas fluidi in O erit  $\sqrt{a}$  (nam vires seu altitudines quibus generantur in orificio perstante sunt ut velocitatis quadratum mole velocitatis rationem tunc sequente.) Velocitas verò in N est in sectionum inversâ ratione, nempe  $\sqrt{a}:n$  quæ produceretur antecedente fluido non considerato per vim  $a:nn$  velocitatis nempe quadratum. His positis duas tantum fluidi lamellas indefinitæ tenuitatis consideremus; procedit antecedens cum velocitate  $\sqrt{a}:n$  vi  $a:nn$ , sequens insequitur cum vi  $a$ . Supponamus nunc in contrariam pelli partem lamellam utramque per vim  $a:nn$ .

Fig. 5.



( quod earum collisionem vel pressionem non mutabit : ) inde totaliter destruetur vis antecedentis lamellæ quæ per consequens quiescet , vis verò sequentis fiet  $a - (a) : nn$  , in quo casu propter antecedentis immobilitatem pressio lateralis vi totali æqualis , erit etiam  $a - (a) : nn$ . Pressio autem eadem est citrà adhibitam suppositionem , modò prior lamella cum velocitate  $\sqrt{a} : n$  , posterior cum vi  $a$  procedant ; quod cum ita sit in toto tubo , ubivis etiam eadem erit lateralis pressionis formula.

49. Patet autem quod si eadem sint & antecedentis lamellæ velocitas & consequentis vis , eadem remanebit lateralis pressio , quæcumque mutatio in reliquis conditionibus acciderit. Sed velocitas antecedentis lamellæ eadem est modò per emissarium eadem effluat dato tempore quantitas. Si igitur cæteris paribus tubus prædictus ramificetur , ita ut per omnes simul ramos effluat eodem tempore quantitas quam emittebat emissarium O , erit eadem pressio lateralis. Cùmque ratio N : O & ratio quantitatis liberè effluentis per N ad quantitatem eodem tempore effluentem per O , vel ad ipsius æqualem per ramos omnes effluentem æquales sint , idem habent exponens  $n$ . Unde si in alveo quocumque cognoscatur ratio quantitatum liberè per immissarium & actualiter per emissarium effluentium , substituendo in præcedenti formulâ ejus exponens pro  $n$  , & pro  $a$  altitudinem generatricem ,  $i : e : \text{quadratum velocitatis liberæ in immissario} ; \text{determinata erit pressio lateralis in immissario per formulæ valorem.}$

50. Alveo eodem manente si immutetur vis totalis , proportionaliter immutabitur lateralis pressio. *Demonstr.* Multiplicetur in formulâ  $a$  per numerum quemcumque  $m$  , fiet  $am - (am) : nn$  quasi ipsa formula per  $m$  multiplicata fuisset.

51. Quò major erit differentia quadrati velocitatis potentialis seu fluidi liberè tranantis & quadrati actualis seu in tubo integro , eò major erit lateralis pressio. Nam formula  $a - (a) : nn$  , ipsa est differentia horum quadratorum.

### *Pressio lateralis in Venis.*

52. Si nullus daretur trans Venas affrictus , velocitas potentialis seu quâ Sanguis liberè tranaret , esset eadem in omnibus sectionibus , (38) formant enim alveum decrecentem. Sed propter affrictum aliquantum hæc velocitas potentialis continuò minuitur ab extremis in cavas , dum simul velocitas actualis continuò augetur ; ergo duplici de causâ minuitur semper quadratorum ipsarum differentia & consequenter pressio lateralis. Ita ut , quod paradoxum videbitur , majori vi distrahan- tur venulæ cujusvis parietes quam ipsius cavæ.



53. Ligatâ Venâ ad phlebotomiam celebrandam Sanguis progredietur, pressio igitur lateralis vi totali fit æqualis (45), nullus autem percipitur motus in Venæ parietibus ergò vi semper æquali distenduntur & vis totalis eadem est sive in Diastole sive in Systole Arteriarum. Inde fit ut pertusâ venâ Sanguis eâdem semper velocitate effluat, & in Systole & in Diastole eâdem vi per constans orificium propulsus.

54. Cùm verò vis Sanguinis in trunco pendeat à vi ipsius in ramis, quâ alternatim sensibilibiter immutatâ pariter immutaretur in truncis; sequitur vim & velocitatem actualem Sanguinis eandem esse in quâlibet venulâ & in Systole & in Diastole Arteriarum; quod in vivis Animalibus per microscopium observatur.

55. Pressio autem lateralis pendet unicè ex vi fluidi insequentis & velocitate actuali antecedentis; erit igitur semper eadem in quolibet Venarum puncto, & cum semel erit in æquilibrio cum tunicarum resistantiâ, eas ulterius dilatare non poterit, amplitudoque acquisita servabitur, in statu corporis permanente.

#### *Pressio lateralis in Arteriis.*

56. In Arteriis tempore Diastoles, velocitas potentialis continuò minuitur dum actualis minuitur etiam, adeoque cum ex unâ causâ decrescat pressio lateralis ex alterâ verò augeatur, ejus proportio alio modo determinanda est. Supponamus itaque  $m$  esse quantitatem fluidi arteriolas omnes ultimas dato tempore tranantem. Tum secetur arteriosus alveus in pluribus locis, quantitasque eodem tempore effluens vocetur  $M$ ,  $M : m$  erit valor substituendus pro  $n$  (49) in formulâ. Velocitas autem in quolibet immissario vel sectione erit  $M : S$ , unde  $MM : SS = a$ ; quibus substitutis in formulâ, fiet  $(MM - mm) : SS$  undè patet quod continuò decrescet pressio lateralis a truncis versùs ramos duplici ratione, tum molis effluentis decrescientis tum sectionis continuò auctæ.

57. Pressio lateralis in Arteriis tempore ipsarum Systoles parvâ attentione digna est cùm superetur per tunicarum contractionem, ne tamen intacta prorsùs maneat sic poterit definiri. Dividatur alveus per sectiones in spatia æqualis longitudinis, sintque  $m$ ,  $M$  moles liberè effluentes in primâ & secundâ sectione; sectiones sint  $1 : p$ . vires in sectionibus erunt  $mm$ ,  $MM : p$  (30) & suppositâ movendâ mole eâdem, erunt inter se ut velocitates actuales in sectionibus ut  $1 : (2 : p)$ , unde multiplicando media & extrema formatur æquatio  $2mm = MM$  &  $m\sqrt{2} = M$ , sed falsa suppositio & revera ratio virium major est, ob majorem in primâ sectione movendam molem (42) unde  $m\sqrt{2} > M$ . Velocitates verò potentiales sunt ut  $pm : M$ , vel in majori ratione,



quàm  $pm : mV_1$ , quàm  $p : V_2$ . Si igitur  $p$  sit æqualis vel major  $V_2$  in Arteriis, vel ita minor ut differentiâ molium movendarum abundè compensetur, velocitas potentialis erit maior in primâ quàm in secundâ sectione, decrescet ergò in hoc Arteriarum tractu, sed simul crescit in truncis saltem (28) velocitas actualis, indè igitur duplici de causâ ut in Venis imminuetur lateralis pressio in Arteriarum truncis, tempore Systoles. Suppositio autem nostra de incremento alvei arteriosi ex mensuris & ipsâ autopsiâ confirmatur.

### *Corollarium generale.*

58. Pressio lateralis maxima est in Arteriarum Diastole propè Cor, indè continuò decrescit in magnâ proportionem usque ad Venas, per quas minùs sed multùm adhuc decrescit ad cavas usque ubi minima est. In Systole verò, major est in truncis arteriosis, decrescit per truncos, & in ultimis arteriis vel initio venularum eadem est ac in Diastole, rursusque eodem modo decrescit per Venas: in quolibet autem Arteriarum puncto major est in ipsarum Diastole quàm in Systole ut ex formularum comparatione patet, & ex ingenti differentiâ virium Sanguinis in his alternis temporibus.

### *ART. IV. De circulatione à sinistro Cordis ventriculo ad dextrum generali.*

Sanguis è sinistro ventriculo per aortam ejusque propagines ad omnes corporis partes defertur, & inde redit per Venas ad utramque cavam & in ventriculum dextrum, hæc est circulatio per totum corpus generalis. Ex ventriculo autem dextro per Arteriam pulmonalem ad Venas ejusdem nominis transit & exinde ad ventriculum sinistram, hæc est circulatio trans Pulmones specialis, quæ ambæ totam circulationem absolunt. De primâ in hoc Articulo, de secundâ in proximè sequenti.

59. Cor contractione suâ ex sinistro ventriculo in aortam propellit Sanguinem, qui premit & antecedentem fluidi molem & vasorum parietes, unde duplex sequitur effectus 1°. Progressivus motus in toto vasorum systemate arterioso & venoso, 2°. Dilatatio subita Arteriarum ad tactum sensibilis seu *pulsatio*, ex quâ major Sanguinis copia quàm antea in ipsis continetur. Subitò dein relaxatur Cor, contrahuntur simul Arteriæ omnes, semilunares valvulæ regressum impediunt, unde per expressionem exuperantis in Arteriis molis progressivus iterùm generatur motus in toto vasorum systemate, ex Arteriis per venas ad Cor.

60. Tam mirabilis est autem motuum diversissimorum Cordis nempe



& Arteriarum contractionis proportio, ut idem exindè producatu<sup>r</sup> effectus in extremis arteriis, in quibus omni tempore quicunque sit de reliquo corporis status, Sanguis eâdem semper quantitate, eâdem velocitate, eâdemque vi progreditur. (54.) Unde fit ut jugi & æquali semper fluente liquida nostra procedant & in Venis & in secretoriis vasis, quibus potissimum ad secretionum uniformitatem hanc harmoniam destinasse videtur providum Numen.

61. *Pulsant* Arteriæ ob variabilem in ipsis vim Sanguinis lateralem, alternatim majorem & minorem. Nam Corde sese contrahente pressio lateralis quæ prius ab Arteriarum contractione superabatur, intenditur multum resistantiamque Arteriarum superans eas distendit. Relaxato dein Corde cessante laterali pressione cessat & ipsius effectus, Arteriæque contractio ut prius iterum permittitur. Hinc alternatim distenduntur & contrahuntur tunice seu *pulsant*.

62. Pulsant omnes simul Arteriæ propter columnæ sanguineæ continuitatem, unde omnes Sanguinis particule motum simul accipiunt, sitque pressio lateralis à Sanguinis motu pendens in omnibus simul peractis. Contrahuntur simul omnes propter deficientem ubivis simul lateralem pressionem contractionis in uno Pulsant vel ampliatur magis maiores quam minores, quia ampliatio in omnibus sectionibus absolute æqualis est (19), & inde proportionaliter major in minoribus sectionibus seu in majoribus Arteriarum truncis.

63. Venæ non pulsant, ob æqualitatem pressionis lateralis in ipsis omni tempore, unde cum constans etiam situnicarum resistantia, ubi semel æquilibrium factum est inter has vires oppositas, illis in statu constanti nunquam mutatis æquilibrium perpetuum est & eadem Venæ diameter necessarîo servatur. Pendet lateralis pressionis æqualitas, 1<sup>o</sup>. Ab æqualitate motûs Sanguinis in ultimis arteriis 2<sup>o</sup>. Ab æqualitate resistantiæ in cavis. Quantâ vero cum sapientiâ hæc resistantia eadem per appositam auriculam servata fuit! Corde enim nunc aperto nunc clauso, vicissim ob aditum Sanguini permissum vel negatum resistantia nunc minor nunc maior fuisset & indè laterali pressione similiter mutatâ Venæ pullarent, turbataque fuisset fluxûs uniformitas in secretoriis vasis, nisi adesset auricula quæ alternis cum Corde vicibus modo aperta modo clausa est, unde unâ ex illis viis semper liberâ eadem omni tempore resistantia servatur.

64. Quantitas Sanguinis è ventriculo sinistro per unam ipsius sytolen egrediens non statim per arteriolas effluit, sed in duas dividenda est partes quarum uni æqualis est moles per arteriolas Diastoles ipsarum tempore transiens & alteri æqualis moles quæ in ipsarum Systole per



eundem locum transibit. Quæ postrema cum præcisè contineatur in alveo arteriosi ampliatione per ipsius Diastolen efformatâ, mensuram ampliationis dabit accuratam. Si igitur dimidia pars molis è sinistro ventriculo exeuntis per arteriolas transeat in ipsarum Diastole, alterum transibit dimidium in ipsarum Systole & alveo arteriosi per Diastolen ampliatio æqualis erit dimidio molis per unam sinistri ventriculi contractionem emissæ.

65. Sequitur autem ex uniformitate effluxûs per arteriolas omni tempore, quòd moles effluentes in Diastole & Systole Arteriarum sint ipsarum durationi proportionales. Si igitur æquali fiant tempore Diastole & Systole (ut reverà fiunt quantum attenta observatio Cordis testudinis & anguillæ in motibus adeò subitis docere potuit) æquales erunt massæ effluentes, & alveo arteriosi ampliatio æqualis erit dimidio molis è sinistro ventriculo quâvis contractione ejectæ.

Fig. 5. 66. His positis ad ipsam causam uniformitatis effluxûs trans ultimas arteriolas tandem assurgamus; hæc autem nobis quærenda videtur unicè in difficultate maximâ transfluxûs Sanguinis per arteriolas, unde lateralis pressio vi totali sensibilibiter æqualis evadit & vis contractionis Arteriarum æqualis vi Cordis contractivæ ac proin ab æqualibus semper viribus æqualis fit semper fluidi transfluxus. Quod ut clariùs pateat, sit ratio immissarii N ad emissarium O maxima, evidens est quòd pressio lateralis erit sensibilibiter æqualis vi totali cum in formulâ (48)  $a : m$  negligi possit. Sic fluidum in tubo laterali ascendet ad altitudinem B æqualem altitudini A vim totalem exprimenti. Si subito nunc obturari concipiatur N vis totalis omninò cessabit, agerque tantum columna fluidi in laterali tubo inclusa, sed hæc columna altitudini vis totalis æqualis est, ergò eandem vim habet, unde fluidi velocitas eadem semper servabitur in emissario. Si nunc columnæ fluidi loco quæ in descensu de vi suâ deperderet supponatur pondus embolo in tubo laterali impositum vi totali ferè æquale, evidens est quòd in ascensu & descensu hujus ponderis immissario modò libero modò clauso eadem semper servabitur effluentis liquidi in emissario velocitas, vis & moles, & si æquale sit tempus obturationis & aperturæ immissarii, perfectam habebimus circulationis imaginem.

67. Remanet ut suppositam transfluxûs difficultatem demonstremus. Notum est quòd vigesima tantum pars aquæ per truncum Arteriæ mesentericæ liberè effluentis eodem tempore tranare possit ultimos ejus ramulos transversim sectos, unde factâ ratione immissarii ad emissarium,  $20 = m$  formula evadet (49)  $a - (a) : 400$  & unâ tantum quadringentesimâ parte deficiet lateralis pressio à vi totali. Verùm attendite 19. quòd in integris



integris mesentericæ Arteriæ ramulis fluidum minori tranet copiâ, quàm in resectis. 2°. Quod Sanguis longè difficilius ipsos tranet quàm aqua, crassitie & tenacitatis ratione 3°. Quod tandem arteriolæ musculares sint mesentericis minus perviæ; unde multò major evadit ratio immis-  
sarii ad emissarium assumpta, & per consequens differentia inter vim totalem & lateralem pressionem omninò negligenda.

68. Evidenter ex his sequitur quòd cum in fine contractionis Cordis æquibretur vis Arteriarum contractiva cum vi totali à Corde Sanguini impressâ, cessante subitò vi totali nihilominus per contractionem Arteriarum, eodem prorsus velocitate movetur Sanguis trans extremas arteriolas ac durante Cordis Systole.

69. Uniformitas effluxûs per totam Systolen Cordis ex eo intelligitur, quòd Cor non elasticâ sed muscolari vi contrahatur, unde ejus vis eadem manere potest durante totâ Systole, & idem semper motus Sanguini aortam trananti conciliari.

70. Uniformis etiam erit effluxus per totam Arteriarum Systolen, modò vis Arteriarum contractiva non sensibiliter mutetur in unâ ipsarum Systole. Hæc mutatio foret sensibilis si in fine Systoles ad statum contractionis ferè naturalem redigerentur tunicæ; sed si minima sit fibrarum orbicularium decurtatio, magnaue adhuc differentia inter illam decurtationem & brevitatem quam ex liberâ elasticitate acquisivissent patet pro uniformi posse sumi ipsarum vim contractivam.

71. Ut illud certiùs definiretur sequens institutum fuit experimentum. Arteria cruralis cujus pulsatio ad tactum æqualis erat solitæ pulsationi Arteriæ radialis in Homine, vivo Cani denudata fuit; nec filo circumdante nec circino nec ad oculum ulla potuit assignari differentia diametrorum in Diastole & in Systole, adeò insensibilis erat; mensurata tamen post mortem Arteria quadruplo minor reperiebatur quàm in vivo Animali. Undè patet quàm parva sit decurtatio fibrarum orbicularium respectu brevitatis quam ex liberâ elasticitate acquisivissent.

72. Utrùm merè elastica an verò muscularis etiam vis Arteriarum contractiva statuenda sit parùm refert in statu Physiologico, videbimus autem in statu morbofo muscularem contractionem facile posse demonstrari. Hâc positâ in statu sano, eodem modo intelligeretur contractionis Arteriarum uniformitas ac de Corde dictum fuit. ( 69 )

73. Ex effluxûs Sanguinis uniformitate trans Arteriolas & Venas deducemus Cordis dilatationem fieri per musculares fibras non ex impetu Sanguinis venosi. Quæcumque enim fingatur in ipso flacciditas post Systolen absolutam, minor erit multò flacciditate auriculæ in ipsâ Cordis Systole, ergò resistentia Sanguini venoso opposita major erit tempore



Diaстоles quàm tempore Syстоles & per consequens alternata erit retardatio & acceleratio in ipsius motu, quod falsum.

74 Sed plurima ad hanc veritatem nos ducunt. 1°. Analogia cum reliquis musculis, qui cessante etiàm musculari contractione vi sat magnà decurtantur ut sit in antagonistâ musculi resecti. 2°. Renitentia Cordis in ipsâ Diaстole in vivis explorata. Magnà vi igitur Cordis parietes resistunt appellenti Sanguini, cujus 3°. motus minimus est in cavis prope Cor tot affricibus admodum debilitatus quem 4°. si contractio auricularum sufficienter restitueret, tamen cum communicetur fluidorum pressio in omnem sensum non prius dilataretur Cor quàm Venarum tensio ad æquilibrium devenisset cum Cordis renitentiâ quod observationibus adversatur. 5°. Tandem Cordis Diaстole peragitur in Corde etiam resecto vivacium animalium, quod Phænomenum tot Hypothesium everfor manifestè tamen stabilit dilatationem illam pendere à causâ Cordi intrinsecâ à motu proprio aliquot fibrarum, quæ fibris contrahentibus antagonistæ sunt. Hæc fusius explicantur ab illustrissimo D.D. *Hamberger*, qui fibras Cordis Diaстoli inservientes detexit.

75. Superest ut Sanguinis motum per diversas Aortæ propagines paucis prosequamur. Primæ ab Aortâ oriuntur Coronariæ quæ Sanguinem in ipsam Cordis substantiam devehunt. Earum pulsatio à plurimis Auctoribus heterochrona pulsationibus reliquarum omnium censetur, his potissimum rationum momentis. 1°. Orificia coronariarum à valvulis semilunaribus teguntur in Arteriarum Diaстole, undè tunc Sanguis eas subire nequit. 2°. Ob Cordis in Syстole tensionem stringuntur vasa Sanguinique aditum præcludunt. 3°. Cor pallet in contractione, ergò de facto Sanguinem tunc in suâ substantiâ non admittit. Hæc omnia in opposito sunt statu relaxato Corde, tunc ergò tantum suum Sanguinem recipere potest.

76. Hanc tamen anomaliâ in Sanguinis motu nondum sufficienter probatam, haud admittimus. 1°. Enim talis est sæpius situs orificii Arteriarum coronariarum ut per valvulas tegi nequeat. 2°. Ex Cordis tensione non sequitur ita comprimi coronariarum truncos ut Sanguinem vi maximâ adauctum non admittant; si autem ramusculi tantum comprimantur, laterali pressione per strictiorem viam adauctâ, trunci fortius adhuc pulsabunt. An dixeris Sanguinem contractum musculum non subire, dum sæpe diutissimè perstat contractio voluntaria? 3°. Quoad pallorem observatur tantum in extimâ Cordis membranâ & successivè ab unâ ad aliam partem transit quod probat tantum membranam illam validè in diversis punctis successivè comprimi. Nec semper reperitur, sed potissimum in cordibus ferè membranaceis; fatetur D. *Haller* Boerhavianæ opinionis etiam assertor.



77. Sanguis per carotidas ad cerebrum ascendens non diversam videtur à reliquâ massâ indolem obtinere, nam separatio determinatarum partium in fluido aliquatenus viscoso fieri non potest dum magnâ velocitate amplum subit orificium. Partium situs determinat potius ramorum positionem quam Sanguinis diversitas — Internæ carotidis vertebralisque ad ingressum cranii inflexiones vim Sanguinis viscosi minuunt, quod non accideret in fluido perfecto. Inde cæteris paribus lateralis minuitur Sanguinis pressio in cerebri vasis, quod fit etiam ex faciliiori transfluxu per numerosos amplosque meningum sinus.

78. In intercostalibus velocitas Sanguinis actualis major est quàm in Arteriis ejusdem amplitudinis remotiùs à Corde positis, v. g. in inferioribus artubus; illæ enim strictioris in alveo sectionis partem constituunt; & ex eâdem causâ vis Sanguinis erit etiam in illis major. Sed pressio lateralis eadem esse potest, aucta quidem ex vi majori sed imminuta ex majori actuali velocitate (51). Positâ autem æquali obstructione in his Arteriis, intercostalium distensio cæteris paribus erit major, dolor proinde acutior & funestior inflammatio quàm in remotiori parte. In propioribus hisce vasis citiùs absolvetur Sanguinis circulatio quàm in remotioribus ob brevioram viam majoremque simul velocitatem.

79. Fluidorum transitum per mesentericas Arterias multò liberiores esse quàm in reliquis Arteriis experimenta docent, facillimè enim injecta tepida in cavum intestinorum penetrat, unde intelligitur copiosam in his colis fieri debere secretionem.

80. In Venis artuum præsertim, observantur valvulæ liberam viam ab extremis ad Cor permittentes, oppositam negantes; quarum consequenter usus est, ut præpediant Sanguinis regressum à truncis in ramos, si fortè per compressionem Venæ illatam vel ab aliâ quâcumque causâ retrogradus Sanguini motus imprimeretur.

81. Vena portarum id habet singulare quod Arteriæ officio quodammodo fungatur, ipsius enim truncus collecto Sanguine ex abdominalibus visceribus reduce, rursus in ramos ramulosque dividitur hepatis substantiæ immerfos in quibus vis Sanguinis minima evadit, quod ad bilis secretionem requirebatur.

82. In vario partium situ non spernendæ in Sanguinis circulatione mutationes accidunt gravitati diversè agenti debitæ. In erecto situ v. g. Sanguis arteriosus carotidas tranans à gravitate de vi suâ deperdit, ponderant enim partes superiores in infimas, majoresque resistentias progressui opponunt, indè augetur lateralis pressio magisque distenduntur Arteriæ parietes minori impetu Sanguis cerebri vasa ingreditur. Cum verò carotis temporalis ossis obliquum transiit foramen, Sanguis non



amplius directè ascendens retardationem nullam notabilem à gravitate patitur. Per jugulares autem Venas Sanguinis motus à gravitate acceleratur, velocitas actualis in sinibus augetur & consequenter in cerebri vasculis. Unde duplici de causâ ex auctâ velocitate actuali, & imminutâ vi totali, lateralis pressio in cerebri vasculis imminuitur per gravitatis actionem in erecto situ. Invertatur Homo caputque infimam partem obtineat, tunc Sanguis liberiùs carotidas tranat, majori impetu in cerebrum defertur, dum in jugularibus non secus ac compresso collo regressus impeditur, unde auctâ laterali pressione infarciuntur & distenduntur capitis vasa, rubet facies &c. In medio autem situ ut in horizontali decubitu media erit Sanguinis circuitûs facilitas.

83. Ex iisdem sequitur principis Sanguinis motum difficillimum esse in inferioribus artubus, tam ob distantiam à Corde majorem quàm propter Venarum situm. Nec indè mirum si morbi à fluidorum stagnatione oriundi ut Hydrops in pedibus prima vulgò sui indicia exhibeant.

#### ART. V. *De circulatione à dextro ventriculo ad sinistrum trans Pulmones.*

84. In Adultis nulla est via à dextro Cordis ventriculo ad sinistrum quàm per Pulmones trans ipsorum Arterias & Venas. Constricto nempe ventriculo dextro auriculare ostium per mitrales valvulas clauditur, compressusque ab omni parte Sanguis in solam pulmonalem Arteriam effugere potest quàm subire cogitur: Relaxato dein Corde, quo tempore contrahitur aorta contrahitur etiam Arteria pulmonalis, regressuque per semilunares valvulas præpedito Sanguis ulteriùs propellitur, donec eodem mechanismo tranatis arteriolis venulis & sinibus pulmonalibus in sinistri lateris auriculam & ventriculum perveniat.

85. *Velocitas Sanguinis relativa* easdem sequetur leges in Pulmonibus ac in reliquo corpore, cùmque alveus arteriosus continuò à Corde crescat per pulmonalem Arteriam, venosus autem à venulis ad sinum pulmonalium Venarum continuò minuatur, decrescet Sanguinis velocitas per Arteriam in ipsius Diastole, crescetque omni tempore per Venas usque ad Cor; & erit major vel minor in certis sectionibus venosis quàm in aliis arteriosis pro sumpto sectionum loco, quod nullius est momenti: ita ut quæstio de proportionem amplitudinis Arteriæ & Venæ pulmonalis merè sit Anatomica, parùm ad Sanguinis motum faciens, & nihil omninò ad ipsius densitatem cùm necesse non sit ut à pluribus supponitur æquales contineri Sanguinis quantitates, intrâ pulmonales Venas & intrâ Arterias, quamvis æquales utrobique eodem tempore tranent.



86. Eadem Sanguinis copia ex utroque Cordis thalamo in Systole exprimitur, & æquales fluidi moles Arteriam pulmonalem & aortam fubeunt, ut ex uniformitate circulationis evidenter patet; est ergo Sanguinis velocitas in quâlibet sectione Arteriæ pulmonalis ad velocitatem in quâlibet aortæ sectione in inversâ sectionum ratione. Erit per consequens æqualis initio aortæ & initio Arteriæ pulmonalis quòd sectiones ibi sint æquales. Sed in ultimis arteriis pulmonalibus velocitas Sanguinis erit tantò major quàm in ultimis propaginibus aortæ, quantò sectio arteriolarum omnium pulmonalium minor est sectione arteriolarum omnium aortæ.

87. *Vis Sanguinis* initio Arteriæ pulmonalis longè minor est quàm initio aortæ, quòd dexter ventriculus sit sinistro debilior. Cùmque velocitates actuales eadem sint in his locis, sequitur affrictu neglecto vires esse in ratione movendarum molium seu ut pondus Sanguinis pulmonalis ad pondus Sanguinis reliqui corporis, circiter ut pondus pulmonis, ad pondus reliquarum partium carnearum. Verùm ob affrictus longè majores trans aortæ propagines quàm in Arteriâ pulmonali augenda erit adhuc multum vis Sanguinis in aortâ.

88. *Pressio lateralis* habebitur ut priùs in aortâ per formulam suprâ demonstratam (48) decrescet à trunco versùs ramulos tempore contractionis cordis, iterumque adhuc trans pulmonales Venas. (56. 52.) Verùm vix conferri potest pressio lateralis in Arteriâ pulmonali cum eadem in Aortâ, ob maximam harum diversitatem pro diversis sectionibus institutis. Ut tamen exemplum habeatur, sumamus sectionem ultimam capillarium arteriolarum in pulmone, & inter omnes alvei totius aortæ sectiones ea seligatur quæ æqualis est sectioni arteriolarum pulmonalium; utrobique Sanguinis velocitas eadem erit ob sectionum æqualitatem (86), ergò pressiones laterales in locis Cordi propioribus sequentur rationem vis totalis (51) quæ cùm sit longè major in aortâ, pressio lateralis pariter erit in ipsâ multò major.

89. Arteriæ pulmonales in suâ Diastole ampliantur, probaturque ampliationes esse in omnibus totius alvei sectionibus ut priùs in aortâ physicè æquales per rationes superiùs allatas (18), cùmque vulgò statuatur ampliationem seu pulsationem in Arteriæ pulmonalis trunco esse sensibilibiter æqualem ampliationi trunci aortæ, possumus assumere ampliationem in quâlibet Arteriæ pulmonalis sectione esse æqualem ampliationi cujuscumque aortæ sectionis, undè hæc deducuntur Corollaria.  
1<sup>o</sup>. Ampliatio totalis omnium Arteriarum pulmonalium in ipsarum Diastole, minor est ampliatione totius aortæ. Nam ampliationis magnitudo pendet & ex latitudine spatioli superadditi & ex ipsius longitu-



dine; in nostro autem casu eadem est spatiosi utrinque latitudo, magnitudo itaque rationem longitudinis sequitur, quæ cum sit minor in Arteriâ pulmonali patet eadem proportionem minorem esse ipsius ampliationem totalem. 2°. Dimidia pars Sanguinis à ventriculo sinistro in unâ Systole projecti locatur in ampliatione totali aortæ ut vidimus ( 65 ), ergo minor quàm dimidia pars Sanguinis à dextro thalamo projecti locabitur in ampliatione minori pulmonalis Arteriæ. Undè patet quantitatem Sanguinis à dextro ventriculo quâlibet Systole egredientis in duas inæquales porciones dividendam esse, quarum majori æqualis est moles effluens per Arteriolas pulmonales in Cordis Systole, & minori æqualis est moles effluens in Diastole. 3°. Sanguis velocius fluit per arteriolas pulmonales in Cordis Systole quàm in Diastole, nam æquali tempore utraque peragitur ( 65 ) & orificia tranata sunt eadem, dum moles tranans in Systole major est. Exindè tamen non turbabitur uniformitas affluxûs ad sinistrum ventriculum qui simul recipit Sanguinem & per Systolen & per Diastolen unam ejectionem. Demonstratum fuit ( 66. 67. ) causam æqualitatis motûs Sanguinis trans extremas aortæ propagines esse tantum transitûs difficultatem, non mirum ergo si in ultimis arteriis pulmonalibus quæ faciliè permeabiles ex experimentis deprehenduntur inæquali velocitate & motu feratur Sanguis in Systole & Diastole.

90. Pulmones nunc dilatati sunt in inspiratione, nunc in expiratione contracti; quaeritur diversitas motûs Sanguinis in his temporibus. Primò evidens est aërem ingruentem in inspiratione ponderis sui respectu vasa sanguinea nequaquam comprimere, cum nullo impetu irruat sed leniter insinuetur quâ proportionem dilatatur Thorax, undè uniformis est pressio ab initio ad finem inspirationis: intereà ampliatur pulmo in totâ suâ mole, vasa aliquatenus collapsa arriguntur & expanduntur, via fit liberior, quod sensibilius est in suspiriis ut experimenta demonstrant, altiùs tunc assurgente Sanguine in tubo crurali Arterie verticaliter inserto. In expiratione verò ob vasa collabentia ex imminutâ pulmonis mole, ob aëris pressionem aliquam quòd ex amplo loco per angustam rimulam exprimitur, Sanguinis motus in venulis præsertim minui debet, dum pressio lateralis in Arteriis adaugetur.

91. Hec tamen omnia in tranquillâ respiratione paululum tantum amoliat pulmonibus Sanguinis cursum parùm immutabunt. Imò si paulò diutius contineas pectus in violentâ expiratione nulla observabitur in pulsu notabilis mutatio; Sanguis tamen difficiliùs solito pulmones tranat & vis ipsius in pulmonali Venâ consequenter imminuitur, quidni ergo minori solito quantitate sinistrum thalamum ingreditur? Ratio est quod ventriculi dilatatio à Sanguinis appulsu non pendet sed



à propriis muscularibus fibris peragitur quæ illum æqualiter quâvis Diastole dilatant, undè quasi exsugit eandem semper Sanguinis quantitatem (73) : Cùmque violentus ille expirationis status non multùm duret, sufficiens Sanguinis copia à majoribus venosis truncis suppeditabitur, donec via omninò libera evadat.

## ART. VI. De motibus circulatoriis absolutis computationes.

92. Huc usque relationes tantùm & proportionem motuum propositæ fuerunt, ulterius pergendum determinando etiã absolute quæ circa præcedentia experimentis & computationibus detegi possunt. Lubenter autem fatemur quòd Physica tantùm hic *Acribeia* expectari debeat, cùm computationes principiis innitantur Physicis v. g. mensuris Anatomicis quæ variabiles sunt, si tamen in pluribus subjectis desumptæ fuerint minima erit à vero aberratio: Praestat semper veritatis approximatio Physicè accurata, obscuris ideis plerumque ridiculis quas imaginatio fallax in idgenus motibus æstimandis sibi efformat.

93. Velocitas Sanguinis actualis initio Aortæ & Arteriæ pulmonalis talis est ut eã quovis minuto percurrere posset 32 ped. *Demonstr.* Moles Sanguinis ex uno Cordis ventriculo quâlibet Systole exeuntis est proximè uncia j & sem: cujus volumen positâ ratione gravitatis specifica Sanguinis ad Aquam 25:24, & pondere pedis cubici Aquæ 72 libr. erit 2. 16 poll. quod divisum per Aortæ vel Arteriæ pulmonalis sectionem propè Cor repertam 0. 786 poll. (cùm diameter sit 1 poll.) dabit pro cylindri in transitu efformati longitudine 2. 748 poll. Verùm Systole dimidiam tantùm partem totius pulsationis absolvit, spatium igitur duplum percurreretur in integrâ pulsatione; & si sumatur Cor pulsare 70ies in uno minuto habebitur spatium percurrendum 32. 06 ped. proximè 32 ped.

94. Vis Sanguinis in aortâ propè Cor talis est ut pondere 3 lib. non minori reprimi queat & cum ipso æquilibretur. *Demonstr.* Ex experimentis in diversis Animalibus à D. Hales desumptis & ex ponderibus horum Animalium cum hominis pondere comparatis patet quod Sanguis ascenderet in tubo verticali carotidi Arteriæ hominis inserto ad altitudinem 7.5. ped. Anglicor. i. e. ad altitudinem 7 ped. gallic. (cùm ipsorum ratio sit 124:144) Non multo altius assurgeret Sanguis in tubo aortæ ipsi inserto, si enim omnes liberæ Arteriæ in experimento ligarentur altitudo in tubo carotidi inserto eadem esset ac in aortâ, sed quamvis liberæ sint, ob lateralem pressionem vi totali sensibilibiter æqualem in majoribus truncis minima est differentia ex transfluxu per libe-



ras in experimento reliquas Arterias. Fluida autem ponderant in ratione baseos & altitudinis, ducendo igitur 7 ped. in aortæ sectionem o. 786. productum 66. 024 poll. est massa Sanguinis quæ in dicto loco sustinetur; ponderat autem pollex cubicus Sanguinis o. 694 unc. ergo prædicta massa ponderabit 45. 83 unc. quæ aucta ob vim aliquantum in aortâ quàm in carotide majorem & ob affrictum dabit proximè 3 lib.

95. *Lemma.* Notâ altitudine  $a$  quam corpus tempore  $t$  ex gravitate percurrit, inveniri potest spatium quod corpus ex quâcumque altitudine  $b$  descendens, liberè eodem tempore  $t$  ex vi per lapsum acquisitâ percurreret; est enim  $\sqrt{4ab}$ . *Demonstr.* Sit  $AB = a$ ,  $AD = b$ ,  
 Fig. 6. notum est quod post descensum in D tempore T quo corpus descendit ex A in D percurreret ex vi per lapsum acquisitâ DE duplam AD seu  $= 2b$ . Tempora autem quibus corpora labuntur sunt ut descriptorum altitudinum radices  $T : t = \sqrt{b} : \sqrt{a}$  ergo  $T = (t\sqrt{b}) : \sqrt{a}$  Spatia verò iisdem velocitatibus descripta sunt ut tempora, ergo ut  $T : t$  vel ut  $(t\sqrt{b} : \sqrt{a}) : t$  sic DE seu  $2b$  est ad spatium percursum tempore  $t$  ex lapsu in D, i. e. ex proportionem allatâ  $\sqrt{4ab}$ .

96. Posito quod corpus cadat in B uno secundo, notum est per experimenta altitudinem descriptam AB seu  $a$  esse 15 ped. & 1 poll. Et per consequens spatium uno pariter secundo percursum ex vi per lapsum ab altitudine quâcumque  $b$  acquisitâ erit semper  $\sqrt{((60+1 : 3) \cdot b)}$ . Cognito itaque numero pedum altitudinem ex quâ descendit Corpus exprimente illumque multiplicando per  $60+1 : 3$ , radix quadrata producti erit numerus pedum quovis secundo vi in fine lapsus acquisitâ liberè percurrendorum.

97. Velocitas Sanguinis potentialis seu quâ omni antecedente resistentiâ remotâ progredieretur, in aortâ talis est ut eâ percurreret quovis minuto secundo 20. 5 ped. *Demonstr.* Velocitas fluidi in emissario eadem est ac si acquisita fuisset ex gravitate per lapsum ab altitudine fluidi generatrice, ut patet ex actione gravitatis æqualiter quovis instanti indefinitè parvo auctâ, propositio igitur suprâ demonstrata de corporibus cadentibus fluidorum velocitati applicatur, sumendo generatricem fluidi altitudinem pro altitudine lapsûs, quæ altitudo est 7 ped. in nostro casu unde inito calculo spatium quovis secundo liberè percursum est 20. 5 ped.

98. Itaque percurreret 1230 ped. quovis minuto primo; i. e. 38 vicibus major est velocitas Sanguinis potentialis quàm actualis in aortæ truncato (93). Docent experimenta quod Sanguis in tubo jugulari Venæ inserto decies minùs affurgat quàm in carotide; quovis igitur secundo liberè



liberè percurreret paulò minùs quàm 7 ped. seu triplo minor est velocitas potentialis in cavâ quàm in aortâ.

99. Vis sinistri ventriculi apparens seu pondus quod in contractione sua sustinet est 30 lib. *Demonstr* Cùm ponderent fluida in ratione altitudinis & baseos, ob æqualem altitudinem in tubo crurali Arteriæ applicato erit pondus in Cordis parietes ad pondus in aortæ sectionem propè Cor in ratione basium, vel ut sinistri ventriculi superficies ad aortæ aream ut 8 poll. ad 0. 786 poll. proximè ut 10 : 1, ut 30 lib. ad 3 lib. (94). Scimus majorem esse sinistri ventriculi superficiem si omnium ipsius anfractuum scrupulosa nimis habeatur ratio. Verùm hic negligendæ sunt omnes eminentiæ per lacertulos & columnas efformatæ, nec magis indè pressio Sanguinis à ventriculi parietibus æquilibrata augetur, quàm si extranea corpora hic apposita fuissent.

100. Vim Cordis contractivam & absolutam præcedente majorem consultò omittimus quod postulatis hypotheticis ac incertis admodùm innitatur, nulliusque sit momenti ad sequentium intellectum.

## ART. VII. De Potentiâ motrice.

101. Ob affrictus in nostro corpore continuos præsertim in Sanguinis Circulatione, imminui continuò destruique vires necesse est, quæ si non repararentur brevi fatiscerent & motus & vita. Undè procedat hæc reparatio, an à Corporis structurâ mirabili, an ab Animæ motrice potentiâ superest inquirendum. Ac primò quidem ut generalior totius rei conspectus habeatur, nullus est Mechanicus qui non sentiat perpetui motûs exemplar in machinâ, qualis nostra est, compositissimâ & immensis affrictibus obnoxia inutiliter quæri; qui non admittat à superandis resistentiis imminui vires mechanicas, cùm in nostro corpore eas exindè ut in Febre ac inflammatione adaugeri constet; qui ut evidens non spectet à moralibus causis merè mechanicos motus nunquàm mutari dum motus Cordis reverà ab illis perturbantur. Secundò Metaphysici omnes statuent ex analogiâ inter diversas Animæ proprietates agendi modum ipsius deducendum esse, & immeritò pro impossibilibus in unius facultatis exercitio ea spectari quæ de alterius actu ab omnibus in simili casu nec majori jure conceduntur. Denique rerum justus æstimator ab illâ parte tenebras, difficultates insuperabiles, ab hâc verò perfectam Analogiam, directas probationes, omnia plana simpliciaque reperiens brevi pronuntiabit vitales motus ab animâ pendere. Hæc ulterius breviter tamen explananda.

102. Nulla vis noscitur corporea quæ vitales motus possit continuò



redintegrare. Excluduntur primò ne chimæris impugnandis tempus inutiliter teratur, chemicorum effervescentiæ, ignis interni in Corde vel alibi locati expansio, æris in pulmonibus rarefactio &c. Quæ omnia hodiè obsoleta sunt & à recentioribus Physiologis abundè confutata. Gravitati & attractioni, virium nostrarum reparationem & auctis resistentiis incrementum nullus adhucdum tribuit. Undè unica remanet vis corporea quæ considerationem mereatur, elastica nempe, cujus ope mechanicè ut aiunt explicare conantur functiones vitales & naturales. Imò per eam intelligitur illud paradoxum quomodo vita post mortem seu sejunctionem Animæ à corpore subsistere posset, ad hoc enim sufficit ut eadem maneat Corporis dispositio. Cor nempe Sanguini arterioso & venoso motum communicat per contractionem suam; arteriosus Sanguis motum imprimit fluido nerveo in cerebro & indè per nervos ad Cor, dum ex alterâ parte venosus in Cor propulsus illud dilatat unde alternæ fiunt & perpetuæ contractio & dilatatio. Objicies forsan ex his communicationibus deperdi motum, unde minori vi appellant venosus Sanguis & liquidum nerveum ad Cor quàm arteriosus Sanguis indè propulsus fuerat; verùm notandum est fibras Corporis nostri ita elasticas esse ut per oscillationem suam fluidis ipsas moventibus novas vires communicent.

103. Falsa hæc ratiocinia Physices principiis vel leviter imbuto nunquàm fucum facient, sciet enim nullum esse Corpus perfectè elasticum, fibras nostras elatere tantum debili gaudere, & nedum sese restituant vi majori quàm ea quâ inflexæ fuerunt (quod in perfectò etiàm elatere non accideret) vi longè minori & amotâ tantùm vel imminutâ pressione distendente, eas contrahi posse. Est igitur impossibile vires ab elasticis fibris Corporis nostri vel ab elasticis particulis alimentorum aut fluidi nervei mechanicè reparari, quocunque enim artificio illa elateria disponantur fiet continua motûs deperditio.

104. Qui talium Hypothesium falsitatem perspiciunt, nec tamen potentia motricis spiritualis actionem volunt admittere, lumen fugientes densis tenebris sese occultare conantur. Vitalium motuum originem sibi incognitam profitentur, & inexplicabilem, sed simul quod contradictorium audacter eam corpoream esse pronuntiant. Dein quæstionem sexcentis aliis nihil ad rem facientibus involvunt; quis intelligit Astorum motum? quis plantarum nutritionem noscit? quasi ex eo quòd hæc omnia forent incognita, minùs clarè cognosceretur actio potentia motricis in Homine. Omnem interea enucleationem accuratè avertunt ne dissimilitudo maxima observetur, nam præterquàm quod in plantis liquores à Solis calore, à partibus quibus adherent terrâ potissimum us



per roris & vaporum ascensum intelligitur motum suum habere possunt. minimi sunt illi motus, quales in aquâ immersum pannum penetrante agnoscuntur & per ascensum liquorum in capillaribus tubis explicati; dum Cordis ac Sanguinis motus magni sunt sensibilesque nec mechanicè possunt intelligi. Num adhuc dicendum erit plantarum motus à causis tantùm physicis mutari posse sed Cordis vires à moralibus? Ast qui talia proponunt ut verum fateamur ea parvi facere videntur, cum nihil unquàm circa hæc distinctum & enucleatum hucusque proposuerint.

105. Superest ut in Corpore non reperientes in aliquo spiritu reparationem virium nostrarum inquiramus. An in Deo, an in Animâ? Utrumque possibile, sed cum Deus per secundas potius causas agere amet & in Animâ potentia motrix in voluntariis motibus agnoscatur, ipsi reliquos, circulatorios præsertim tribuendos esse censemus. Quò distinctiùs omnia evolventur eò plures inveniemus assumptæ sententiæ demonstrationes, ut veritatis proprium. Doceat primò Metaphysica perfectam esse analogiam inter potentiam motricem & facultatem cogitandi quoad agendi modum; eaque tantùm illi à nobis tribui quæ de hac ab omnibus prædicantur.

### *Principia Metaphysica.*

106. Quatuor præcipuè facultates in animâ agnoscuntur, cogitat, vult, sentit & movet. *Cogitatio* seu idearum perceptio vel repræsentatio nihil aliud est quàm actus Animæ quo ideam efformat. Librum v. g. intueor, habeo ideam hujus libri, de hoc libro cogito per proprium facultatis meæ cogitandi actum. Nec dicatur Deum hanc ideam Animæ repræsentare, tunc enim aliis adhuc oculis quasi spiritualibus indigeret ut ideam à Deo oblatam perciperet, semperque ad actum facultatis cogitandi recurrendum erit.

107. *Motrice* etiam facultate Anima prædita est; in diversis enim motibus voluntariis exequendis per internum convincimur sensum peculiarem actum à nobis editum fuisse à voluntate prorsus distinctum, vim quandam à nobis emissam, quam rectè motrici potentiæ tribuimus. Voluntas & sensatio non sunt adeò primariæ sed potius cogitationis species & in hac primariâ facultate includi possunt.

108. Facultas *cogitandi* exerceri potest motrice facultate non agente, saltem consequenter ad præsentem cogitationem; nulla enim est necessaria connexio inter cogitationem & motum; sed cum non major sit inter motum & cogitationem, concludimus potentiam *motricem* exerceri etiam posse absque actu ullo cogitandi facultatis consequente; quod



sæpius fit in voluntariis etiã motibus.

109. Facultatis *cogitandi* exercitium duplici modo determinatur. 1<sup>o</sup>. Per actum aliquem reliquarum animæ facultatum. Sic consequenter ad sensationem certæ oriuntur ideæ, consequenter ad voluntatem dum v. g. de præterito aliquo eventu reminisci volumus, omnes illius circumstantiæ per cogitationem menti repræsentantur: consequenter etiã ad potentiæ motricis actum, si enim fibras aliquas cerebri succusserit ideæ correspondentes ab animâ efformabuntur. 2<sup>o</sup>. Determinatur etiã cogitationis exercitium à mutatione independenter ab Animâ in Corpore factâ. Sic dum Canem intueor certo modo retinæ fibræ à lucis radiis afficiuntur & consequenter canis ideam efformo.

110. Duplici pariter ratione & eodem modo determinantur potentiæ motricis actus. 1<sup>o</sup>. Consequenter ad alterius facultatis exercitium, sic ad ideam magis adhuc ad sensationem ignis admoti subito membra retrahimus, sed sæpius consequenter ad voluntatem moventur organa voluntaria. 2<sup>o</sup>. A mutatione quæ independenter ab Animâ fit in Corpore. Sic defixâ in tendinem aciculâ membrorum omnium succussiones, & convulsivi motus in organis etiã voluntariis excitabuntur.

111. Sæpè exercetur *cogitatio* sine ullâ hujus exercitii conscientiâ: quoties enim cogitamus, cogitationem præsentem actum esse facultatis nostræ cogitandi non advertentes? Et pariter exercetur potentia motrix absque ullâ exercitii conscientiâ; quoties enim movemus non advertentes præsentem motum potentiæ motricis effectum esse? In loquelâ deambulatione verbo in omnibus assuetis multum motibus constanter illud observatur.

112. Reflexione autem factâ sentimus plures cogitationes effectum esse facultatis nostræ *cogitandi* quod prius inattenti non advertebamus. Et similiter reflexione factâ sentimus plures motus revera potentiæ nostræ motrici tribuendos esse.

113. Hic verò triumphant Adversarii Achilleum hoc ut putant argumentum proponentes; si Anima motus Cordis perageret reflexione saltem factâ potentiæ suæ motricis exercitium & actionem deberet agnoscere, nam factâ reflexione suarum cogitationum semper conscia est, id est semper agnoscit facultatis suæ cogitandi exercitium. Inanis obiectio quæ sententiam nostram demonstrat nedum ipsius vim quàm minimè labefactare possit; sunt enim cogitationes in quibus Anima facultatis suæ cogitandi exercitium quacunque etiã reflexione factâ non agnoscit, undè ex allatâ ab ipsis analogiâ similes motus dari saltem posse necessariò statuendum est.

114. Cogitationes omnes quæ determinantur (109) à mutatione in-



dependentem ab Animâ in Corpore factâ hujus generis sunt ; In illis anima cogitandi suæ facultatis actionem quâcumque etiam attentione factâ nullatenus perſentit. Hic ad communem omnium experientiam ſolummodo recurrendum eſt : Dum externum objectum agrum v. g. intuemur, quis ſentit illum agrum ſicut conſpicitur eſſe opus facultatis noſtræ cogitandi, nonne è contra falſò ſentimus ideam noſtram extrâ nos exiſtere, à nobis independentem eſſe, ita ut nobis etiam non inſpicientibus non minùs in ſuo loco exiſtere objectum prorato habeamus, cum omnibus inſpectis coloribus quos in objectis nequaquàm ſed in mente ſolâ exiſtere demonſtrant recentiores. Inde factum eſt ut apud vulgus videre & cogitare eſſentialiter differrent.

115. Hujus noſtræ ignorantie cauſam in actibus illis facultatis cogitandi nemo non videt. Anima nempe actus ſuos in hoc tantùm caſu agnoſcit in quo ipſi liberum eſt eos producere vel non producere, ſed quotieſcunque neceſſariò aliquid peragit id ſibi neutiquàm tribuit, ſummi autem Numinis decreto ſancitum eſt ut motâ certâ Corporis fibræ certam ideam anima ſibi efformaret non liberè ſed neceſſariò, undè ignorat actum ſuum.

116. Ideæ igitur in duas ſpecies diſtingui poſſunt in *liberas* & *neceſſarias* in illis efformandis Anima actûs ſui conſcia eſt in his verò nequaquàm, quod eas neceſſariò efformet & conſequenter ad unionis leges. Notandum tamen quod in certis Pathematibus Anima officii quaſi oblita Corpore etiam convenienter affecto ideas correfpondentes non producat, ſic ad peſſimi nuntii adventum objecta oculis etiam obverſantia menti non repræſentantur, nihil auditur &c.

117. Ad potentiam *motricem* qualem eam concipimus nos ducit accuratiſſima Analogia. Motus ut ideæ in duas ſpecies dividendi ſunt in *liberos* & *neceſſarios*. Cùm anima liberum motum producit, voluntarium v. g. tunc reflexione factâ actum ſuum poteſt deprehendere; ſed dum neceſſarium motum peragit conſequenter ad certum Corporis ſtatum illum agnoſcere nequit quòd neceſſariò & ex unionis legibus illum producat. Excepto tantùm ut prius caſu certorum Pathematum ſic accepto peſſimo nuntio ſyncope quandoque corripimur, Corde aliquandiu ferè non contracto.

118. Mirando nexu ſummus omnium Creator Animam Corpore conjunxit ut ſibi mutuò inſervirent ad Hominiſ perfectionem, binis legibus nexus ille perficitur. 1°. Affectis Corporis fibræ Anima certas ideas neceſſariò producere debet. 2°. Poſito certo Corporis ſtatu Anima certos motus neceſſariò efficiet. Sic primariæ mentis facultates cogitatio, & potentia motrix per Corporis ſtatum ad certos actus determi-



nantur sine ullâ tamen eorum conscientiâ ut priûs probatum fuit:

119. Anima non cognoscit motum fibræ quo ad certam ideam producendam determinatur, neque etiâ corporis statum quo ad certum motum efficiendum impulsa est. Equè facîle cum primû lumen oculos afficit ideam ipsius efformat infans ac si centies illam efformasset & pariter adultus non melius in Cor fluidum nerveum propellit quàm infantulus.

120. Quamvis Anima in voluntariis motibus sentiat vis suæ motricis actum, tamen cû n nulla sit relatio nulla similitudo inter hoc exercitium & motum ipsum, non ex intimo sensu motûs à se producti ideam habet, sed ex solis effectibus per organa sua deprehensis. Inde fit ut crassiores tantû motus, sensibiles, ac veluti externos à se editos existimet, internos verò etiam voluntarios nequaquàm sentiat. Sic moto digito eum credimus immediatè à nobis motum fuisse, ex consuetudine edocti a certâ potentiæ motricis applicatione motum illum constanter effici, nec sentimus motum musculo digiti flexori à nobis magis immediatè impressum, longè minûs motum excitatum in brachialibus nervis, quod nempe interni sint.

121. Si igitur etiâ ex voluntate penderet Cordis motus, eâ tantû ratione quòd internus est, ab Animâ ignoraretur, & certæ tantû vis à se emissæ in illo producendo conscia foret.

#### *Actio Animæ in Cor.*

122. Sic ergò ex analogiâ accuratissimâ metaphysicè deducitur potentiæ motricis actionem in Cor absque ullâ hujus conscientiâ non possibilem tantû sed valdè probabilem esse; ex alterâ parte vidimus Cordis motum mechanicè & à causâ corporeâ non peragi; undè sufficienter demonstraretur cuilibet à præjudicatis opinionibus liberato vitales motus ab animâ revera pendere. Sed innumeris viis ad veritatem itur, itaque simplicioribus aliquot argumentis præcedentia quibusdam forsan difficiliora confirmabuntur.

123. Plurimi sunt in Corpore motus primò non voluntarii qui deinceps voluntarii evadunt: sic visi sunt qui voluntariè evomere tandem assueverant; & reciprocè motus primò voluntarii, deinceps non voluntarii fieri possunt, sic per jocos balbutiens infans factus adultus non voluntariè etiâ balbutiet. Undè sequi manifestè videtur vires quosdam musculos nunc voluntariè nunc præter voluntatem per eosdem nervos moventes ex eodem fonte potentiâ nempe motrice hauriri. Nullamque dari realem distinctionem inter musculos voluntati subditos & non subditos, inter vires voluntarias & non voluntarias.



124. Datur ut ita dicam communicatio & actio à Corde ad Animam per nervos, nam vulnus in Corde factum dolorem creat ut factum patet præsertim in vivi sectionibus. Quidni concluderemus dari reciprocè communicationem & actionem ab Animâ ad Cor per eosdem nervos à potentiâ motrice? Certè nullus demonstravit patentem viam in uno sensu, per valvulas opposito motui præcludi, talemque Hypothesein everterent motus in Corde vivi Animalis observandi consequenter ad irritationem factam.

125. Sed Animam in Cor revera agere per motum & consequenter per motricem potentiam demonstrant violentiora animi Pathemata. Nonne in terrefacto debilius frequentiusque Cor pulsat eodem veluti tremore qui in voluntariis musculis observatur? Nonne tandem ut diximus visi sunt qui ad pessimi nuntii auditum subito è vitâ excesserunt penitus cessante Cordis motu? Hæc omnia mechanicè nunquam explicata fuerunt, nec unquam explicabuntur.

126. Verùm ut & surdis etiam audiamur extat observatio rem in aperto ponens. Clarissimus apud Anglos Medicus animi candore & sinceritate notus D. Cheyne non solus sed cum duobus aliis Viris Medicinæ etiam mancipatis, vidit militum Præfectum D. Townshend ad libitum quoties volebat Cordis motum ita paulatim compescentem ut de facto etiam moniti, exploratis severè per speculum respiratione, per digitum Cordis & Arteriarum pulsationibus omnes illum reverâ pro mortuo habuerint crediderintque ludum in veritatem terminatum; jamque è cubiculo excedebant cum Cordis motus redintegrari incepit brevique ad naturalem statum rediit.

127. His omnibus demonstrato potentia motricis Animæ in organa vitalia imperio & regimine, hoc principium ut inconcussum admittere non verebimur, quo innitentes facillimè in sequentibus intelligemus quomodo Cordis vires oppositâ majori resistentiâ quandoque adaugeantur, aliaque id genus Paradoxa antimechanica, adversariis prorsus inexplicabilia ut in Pathologicâ parte demonstrabitur.

## ART. VIII. De Sanguine physicè considerato.

128. Plurima in œconomiâ animali ex simplicibus hydraulices regulis non intelliguntur sed considerationem proprietatum Sanguinis peculiarium absolutè requirunt. Et primò quidem Sanguis est aquâ viscidior, ergò difficilius & majori cum affricu vasa sua tranabit.

129. Sanguis heterogeneum est liquidum tribus præcipuè partibus constans, globulis rubris, globulis flavo-albis, magnâ tandem seri copiâ in



quo nullas detegit microscopium partes, & cui reliqua omnia innas-  
tant. Hæc sibi intimè in vasis sanguiferis commixta sunt, patellâ verò si  
excipiantur brevi adunabuntur globuli præcipuè rubri in purpureum  
trombum fluido sero innatantem. Indè liquet circulatorio motui deberi  
partium Sanguinem componentium miscelam & rubræ partis fluiditatem.

130. Si Sanguinis guttulam microscopio observes, videbis globulos  
rubros post aliquod tempus evanescere, seroque innatare tantum glo-  
bulos secundi generis flavo-albos; ergò per quietem globuli rubri in  
flavos dividuntur, cùmque maximi flavorum sextam tantum rubrorum  
partem adæquent, eos divisos fuisse sequitur ad minimum in sex lym-  
phaticos, seu globuli rubri ex sex lymphaticis adunatis efformantur, quo-  
rum compositionem & resolutionem perspicax vidit Leeuwenhoek. Hinc  
deducimus circulationi deberi globulorum rubrorum in Sanguine con-  
servationem.

131. Sibi relictus in loco tepido Sanguis abit in fœtidam putrilagi-  
nem, quæ in vasis corporis nostri per agitationem continuam præca-  
vetur, & per separationem excretionemque partium corruptarum.

132. In minimis arteriis quæ jam lymphaticæ evadunt, v. g. in mem-  
branâ interdigitali pedis ranæ videntur globuli rubri spongiosi quasi tex-  
tûs singulatim & cum aliquâ difficultate transire imò & aliquando ex  
sphæricis ovals fieri. Illorum igitur magnitudini tribuenda est transitûs  
Sanguinis per extrema difficultas, aditusque in verè lymphaticos quam-  
vis continuos, rubræ parti denegatus.

133. Aër ex Sanguine per antliam Pneumaticam educitur, sed tan-  
tùm post maximam rarefactionem contigui aëris in recipiente inclusi;  
nec majora ibi exhibet elasticitatis suæ indicia quàm in aliis fluidis: San-  
guis enim per vires mechanicas incompressibilis est & per calorem hu-  
mani corporis dilatatur unâ tantum centesimâ parte magis quàm in aëre  
frigido, unde sequitur illum rarefactionem nullam sensibilem pati in hu-  
mano corpore ratione caloris.

134. Sanguinis serum coagulatur per acida mineralia & per Alcohol;  
per calorem etiâ ad gradum 55 Therm. Realm. non inferiorem. Cùm  
verò calor humani corporis vehementissimus infra 40 gradum subsistat,  
sequitur ex calore non posse coagulari Sanguinis serum in Animali vivo.

135. Venosus Sanguis ab arterioso differt in eo quòd non adeo facile  
coaguletur, nec tam splendor rubeat. Venosus est Sanguis in Arte-  
riâ pulmonali, verè arteriosus in Venâ, fit igitur intrâ pulmones mu-  
tatio venosi Sanguinis in arteriosum & in extremis arteriis mutatio  
arteriosi in venosum.

136. Docent autem experimenta Sanguinem Venæ pulmonalis in ani-  
mali



mali suffocatione defuncto, nigrescentem venoso similem reperiri; in sufflato verò per tracheam arteriam aëre ruborem solitum recuperat, & ex illo Sanguine major aëris copia educitur quàm ex Sanguine Arteriæ pulmonalis. Ergò Sanguinis arteriosi rutilatio ex aëris particulis copiosius illum in pulmone penetrantibus deducenda est; conferre potest attritus ibidem ingens.

137. Quoad promptiorem aliquantò coagulationem arteriosi Sanguinis, exindè videtur deducenda quòd ibi adjuvetur à globulorum flavorum visciditate & attractione, dum ipsorum loco diluens effœtumque serum venoso Sanguini redditum illam aliquatenus imminuit.

### ART. IX. *De calore Animalium.*

138. Causam caloris materialem in motu inquirendam esse ex eo patet quod omnis mutatio in Corporibus fiat per motum. Illum autem ex quo producitur calor in minimis corporum particulis dari probant experimenta & ratio, cùmque particulae agitatae sæpè de suo loco non sensibiliter dimoveantur, in oscillationibus ipsarum adesse concluditur. Tandem ex eodem affrictu diversissimi in diversis corporibus producuntur calor & ignis, undè Physici statuerunt dari particulas calori & igni recipiendis ac producendis dicatas quas inde igneas vocant, & existimant caloris gradum ex quantitate particularum ignearum & ipsarum motu pendere.

139. Tales in Animalium corpore dari particulas demonstrat calor ex affrictu in ipso generatus. Imò non calori tantum sed & igni producendo nonnullas aptas esse probant phosphori ex animalibus materiis parati, exhalationes lucidæ excusso frigidâ tempestate indusio noctu conspiciendæ, scintillatio felium, Hominis electrificati, &c.

140. Animalium calor ab interno in ipsis motu pendet, superat enim ambientis aëris gradum cui continuo sui partem communicat. In somno autem placido nullus motus notabilis præter circulatorium exercetur, ab ipso itaque pendet calor; cujus etiam gradus minuitur vel intenditur pro imminutâ vel auctâ circulatione, quâ penitus cessante sensim decrescit ac demum cessat calor animali proprius.

141. Sub eâdem ignearum particularum copiâ, calor respondet affrictui per quem producitur. Affrictus autem triplex concipi potest. 1º. Fluidi in fluidum. 2º. Fluidi in solidum. 3º. Solidi in solidum. Affrictus fluidi in fluidum mechanicus negligi potest in tubis semper plenis, nihil enim est ferè quàm pressio particularum sequentium in an-



recedentes. Motus autem Sanguinis intestinus à circulatorio independens quasi per effervescentiam productus in statu corporis sano cum Chemicorum commentis obsolevit.

142. Duæ igitur affrictûs species in circulatorio motu considerandæ sunt, fluidorum in solida & solidorum inter se. Prima calorem vulgò non gignit sensibilem, videmus enim in machinis hydraulicis aquas non incallescere quamvis magno ferantur impetu & trans strictiores tubos. Calor igitur in humano corpore ex hoc affrictu oriundus repetendus est ex indole Sanguinis peculiari, in quo crassæ reperiuntur particulæ, globuli præcipuè rubri qui ut corpora solida fluido innatantia considerandi sunt. Annon confert specialis adhuc ipsorum materies aliquatenus sulphurea, exsiccari enim seu amoto sero, flammam facile concipiunt.

143. Plurimum autem considerari debet affrictus solidarum partium inter se; innumeris enim constat experimentis ex ipso maximum oriri calorem. Cumque Arteriæ non sint inflexiles tubi sed continuo oscillationis motu gaudeant, patet exinde continuos fieri affrictus inter ipsarum parietes solidasque partes quibus circumdantur, diversos pro variâ ipsarum renitentiâ.

144. Itaque pendet calor ex circulatorii motûs vehementiâ, quo aucto augentur & affrictus Sanguinis in vasorum parietes, & affrictus solidorum inter se per auctum Cordis motum muscularem & per majores Arteriarum oscillationes. Pendet simul ex Sanguinis indole, sæpius enim observatur in Hominibus quorum pulsus idem est quoad magnitudinem & frequentiam diversissimus caloris gradus in statu præcipuè morbofo.

145. Constat ex experimentis per Thermoscopium desumptis, calorem in sanis Animalibus esse ubicunque satis æqualem, ita ut Cor v.g. non magis cæteris partibus caleat. Hoc à duplici pendet causâ. 1<sup>o</sup>. Ex eo quod ubique sit satis æqualis affrictuum proportio. 2<sup>o</sup>. A communicatione caloris continuâ, unde calidiores partes frigidioribus de calore suo communicant, ut patet ex Physicis.

146. Hæc autem qualiscunque affrictuum ubicunque æqualitas ex affrictu Sanguinis in vasorum parietes & ipsorum oscillationibus pendens, vix per computationem accuratam determinari potest; sufficiat igitur ipsius causam crassiori Minervâ indigitasse; Vasorum nempe oscillationes, Sanguinis velocitas & lateralis pressio à Corde ad extrema minuuntur, exinde minuitur affrictus; sed augetur ex auctâ superficierum affrictatum magnitudine, unde ea fit compensatio quæ facit uniformem in omnibus partibus calorem, adjuvante ipsius continuâ communicatione producit.

147. Sanguinis affrictum in vasorum parietes ut solam caloris



causam considerans, eam uniformitatem explicare conatus est clarus Medicus Georg. Martin, statuitque velocitatis imminutionem ab auctâ vasorum superficie ab extremis ad Cor accuratè compensari, modò talis sit arteriosi alvei ampliatio ut cubus diametri trunci sit semper æqualis cubis diametrorum ramorum omnium simul sumptis; talemque reverâ observari proportionem per plures mensuras demonstrare conatur. Sed præterquàm quod ramorum proportio determinata videtur per necessitates partium ab ipsis irroratarum, supponit tacitè æqualem esse lateralem pressionem in toto alveo arterioso quòd falsum. ( 88. )

148. In pulmonibus Sanguinis affrictus trans sua vasa ad perfectionem miscelam major videtur quàm in reliquo corpore. Nam si conferamus ultimæ Arteriæ pulmonalis sectioni, sectionem ramificationum aortæ ipsi æqualem ( 88 ), patet multò majorem esse vasorum superficiem in pulmonali; sed æqualis utrinque velocitas ergò superficiei ratione major erit affrictus & consequenter calor in pulmonibus, qui prætereà ex agitatione pulmonum continuâ ulteriùs augetur; abstractâ tensionum diversitate. Huic nimio calori medela affertur ex aëre frigidiori per extensam bronchiorum superficiem diffuso, semperque renovato. Si deficiat hoc refrigerium ut in Animalibus calidiori loco inclusis sæpiùs observatum fuit, subita mors & omnium liquidorum corruptio consequuntur.

#### ART. X. De circulatione in Fœtu.

149. Cur igitur Fœtus auxilio adultis tam necessario in totum destituitur? Quòd viscus in ipso pulmonale seu placenta longè majus sit proportionaliter quàm in adultis, undè minor affrictus in singulis vasis esse potest qui per eorum ingentem numerum compensatur. Hinc absque magno calore sufficienter atteritur & commiscetur Sanguis revectus per *Arterias umbilicales* ut in adulto per *Pulmonalem Arteriam*, liquorique nutritio in pulmonibus matris præparationem & aeris actionem jam passo sic intimè mixtus, verè *Arteriosus* transit ad Fœtum per *umbilicalem Venam* ut in adulto per *Pulmonalem*.

150. Perforato dein trans umbilicum abdomine, in porrarum sinum sub Hepate & per canalem venosum in ascendentem cavam defertur, inde per circulationis viam ad dextrum Cordis ventriculum, quo contracto pulmones maximè depresso & impervios penetrare non valens, maximâ parte per arteriosum canalem ex Arteriæ pulmonalis trunco immediatè in aortam transit, dum ex alterâ à dextrâ auriculâ in sinistram trans foramen ovale: indè per contractiones sinistri Cordis ventriculi, circula-



tionis vias generales una pars subit, dum altera per umbilicales Arterias ad placentam continuo defertur. Sic patet analogia sanguificationis & in Fœtu & in Adulto, quod absolvit Circulationis Physiologiam.

N. B. Ex characterum defectu certæ quantitates Algebraicæ modo non omnibus usitato expressæ fuerunt, ne autem aliqua difficultas exinde nasceretur aliquot exempla vulgari ratione expressa hic adjicimus.

§. 48  $a - (a) : nn$  lege  $a - \frac{a}{nn}$

§. 57.  $1 : (2 : p)$  lege  $1 : \frac{2}{p}$

§. 95.  $\sqrt[4]{4ab}$

$\sqrt[4]{4ab}$

§. 96.  $\sqrt[4]{((60 + 1 : 3) \cdot b)} \sqrt[4]{60 - \frac{1}{3}b}$




Fig. 3.  $a + b + d = c$



DISSSERTATIO  
HYDRAULICO-MEDICA,  
DE  
SANGUINIS CIRCULATIONE.

---

PARS II.

*De Sanguinis Circulatione in statu morboſo.*

**L**ECTOREM meditabundum non minùs hîc procul dubio quàm Scriptorem detinet ſapientiæ & benignitatis Potentiſſimi Creatoris conſideratio, in mirâ machinæ noſtræ conſtructione expectationem omnem ſuperans. Dolet perſpicax Philoſophus innumera mala quibus eam obnoxiam ſentit in tantâ tempeſtatum inclementiâ, in tam variâ alimentorum diverſitate, in tot animi pathematibus circulationem neceſſariò perturbantibus. Quoties impeditam illam prævidet? Quid reſeret obſtructiones? Quid vitam in ſyncope titubantem reſtaurabit? Omnibus illis periculis generalia jam paravit auxilia providus Deus, non minus in conſervatione quàm in creatione admirandus, quæ pauciſ tantùm expendenda ſunt ne Opusculum ultrâ conſuetos limites nimium extendatur.

ART. I. *De Sanguinis vitiis in copiâ & conſiſtentiâ.*

1<sup>ſ</sup>. Sanguis optimè etiam conſtitutus copiâ nimîâ peccare poteſt, quem ſtatum plethoram veram ſimplicem vocavere. Hujus eff. ctus erunt, 1<sup>o</sup>. Vaſorum omnium repletio & diſtenſio major. 2<sup>o</sup>. Sub iſdem Cor-



dis viribus minor Sanguinis copia in Arterias dato tempore ejicietur, ob auctam resistantiam ex mole auctâ & affrictu non imminuto. 3°. Eâdem ratione Arteriæ in suâ Systole dato tempore minorem copiam in Venas propellent. 4°. Circulatio erit tardior, majori enim mole minori velocitate motâ tardiùs quælibet Sanguinis portio redibit ad Cor. 5°. Calor poterit idem remanere, affrictu imminuto quidem ratione velocitatis fluidi & alvei ampliacionis, sed aucto per vasorum tensionem. 6°. Spissescet Sanguis ob motum imminutum. 7°. Frangetur vasorum tonus per nimiam distensionem. 8°. Pulsus imminuetur vel in altitudine vel in frequentia vel in utrâque. Docet autem observatio, plethoricorum pulsus esse solito rariorem altitudine vix mutatâ.

152. Si augeantur Cordis vires, quod fiet à potentiâ mortice cum tardior Sanguinis motus periculosus evadet, pro virium incremento prædicta symptomata exceptâ vasorum repletionem evanescent, dum intendetur calor. Ea succedent quæ virium nimiam impensam comitantur languor reliquorum motuum & gravitas totius corporis. Plethora hæc vera curatur evacuatione Sanguinis exuperantis, per hæmorrhagiam vel naturalem vel artificialem Chirurgicam.

153. Alia est plethoræ species quæ apparens seu falsa nuncupatur, cuius phænomena non facilè explicanda cautè expendi debent. 1°. Sanguinis volumen in eâ maximè adauctum reperitur, Venæ enim turgidæ apparent & sæpiùs in artubus magis quàm duplicatur ipsarum diameter. Arteriæ ad tactum pleniores vehementiùs micant, & generalis partium rubor minima vascula Sanguine infarcta demonstrat. 2°. Interius corporis pondus adauctum non deprehenditur. 3°. Totius corporis volumen crescit; collum, pedes, genua verbo partes omnes quæ vestimenti constrictæ sunt turgidæ persentiuntur. 4°. Per calorem nimium plethora hæc satis subito producitur vehementiori quæ circulationi conjuncta est. Observatur in Febris æstu, post nimium exercitium, vel calidiori tempestate Cessante calore brevi prorsus evanescit.

154. Plethoræ apparentis causa ex Sanguinis rarefactione vulgò reperitur & rarefactio ex expansione aëris elastici in Sanguine inclusi, & dilatatione Sanguinis ipsius, calori tribuendâ nec diversâ ab eâ quæ Vini Spiritu observatur. Sed quàm parùm allatis phænomenis hæc omnia satisfaciant nemo non videt; nam quandoque maximum est Sanguinis in falsâ plethorâ incrementum, nec ulla in ipso è corpore extracto tantæ rarefactionis indicia adhucdum deprehensa sunt, ut minor specifica gravitas vel per frigus solito major condensatio. Nec clariùs explicatur illius rarefactionis causa, nam aëre elastico destituitur Sanguis, & ipsius rarefactio per calorem negligenda prorsus est ex experimentis patet. (133).



155. Ex experimentis videtur potius admittendum. 1°. Quòd in plethorâ apparente major solito fluidi copia in sanguiferis vasis revera contineatur ut omnia demonstrent. 2°. Cum corporis pondus non adalctum fuerit copiam illam sanguineo alveo superadditam in aliis vasis deficere. 3°. Dari præterea totius corporis rarefactionem absolutam ut patet ex partium tumefactione. Hæc omnia producere potest aëris interni elastici per calorem expansio. Scimus vivum Animal in aëre rarefacto antliæ pneumaticæ inclusum brevi intumescere, quod interno elasticoque aëri se se expandenti necessario tribuendum, aër autem ille in sanguineis vasis non continetur nam portio Venæ cum Sanguine suo è vivo Animali exempta & in vacuo locata nullatenus dilatatur: alibi reponendus est quàm in fluidis in textu nempe cellulari & in interstitiis partium solidarum, talem copiosè extraxit Illustr. Boyle ex carne Animalium mortuorum, & in Anguillæ corde etiam pulsante aër ille usque ad intima corporis penetralia reconditus tumefactionem notabilem in vacuo producebat ut ex ejusdem experimentis patet, in vesicâ urinariâ & in ovis ab omnibus facilè agnosci potest; cum elasticus sit necessario per calorem dilatabitur, augebit corporis volumen, constriquet ac exprimet vascula debiliora qualia sunt lymphatica & excretoria, dum sanguinea firmitatis ratione aperta remanebunt; inde magna pars feri lymphatici in vasis sanguiferis recipietur & cumulabitur. Id confirmat paucitas tenuiorum humorum in statu apparentis plethoræ excretorum: pauca est urina, os siccum salivæ defectu, siccæ faeces, imò parcior insensibilis perspiratio, nimirum cola omnia ab expanso aëre consticta transitum fluido solitum non permittunt, unde infarciuntur sanguinea vasa calore autem immutato ut in fine paroxysmi febrilis observatur & in refrigerio tempestate calidâ vel post exercitum subito accedente, cor dei facto aëre permeabilia cola copiosè suos humores transmittunt, sudor, urina excernuntur, redditoque propriis locis fluido, exoneratur brevi Sanguinis alveus.

156. Peccat etiam Sanguinis copia in defectu undè sequentia accidunt 1°. Vasorum depletio & collapsus. 2°. Per easdem vires Cor facilius evacuabitur citiusque solitam contractionem absolvet. 3°. In primis Cordis contractionibus emissæ Sanguinis aliqua pars in dilatandis aliquantulum collapsis vasis impendetur, minor inde quantitas redibit ad Cor, minorque post aliquot Systoles ex ipso ejicietur. 4°. Pulsus erit igitur parvus, cumque frequentia suos habeat limites poterit paucitas Sanguinis ejecti per eam non compensari. 5°. Ita lentius promoti Sanguine parciores erunt secretiones, fluidum nerveum & consequenter vires imminuentur. 6°. Minuetur calor ex vasorum laxitate & minori



motu. 7°. Si vasa multum collapsa sint ut per ingentem subitamque hæc morrhagiam, altæ fient inspirationes & suspiria ut pulmonalis Sanguis sinistro ventriculo suppeditetur, brevi concident vires, Sanguine ob columnæ interruptionem ad dextrum ventriculum non transmissio & brevi morietur Animal. Curabitur sanguineæ massæ augmento per copiosi chyli suppeditationem & evacuationum suppressionem.

157. Sanguinis consistentia duplici ratione vitatur, per viscositatem & fluxilitatem nimiam. Ex viscositate vel spissitudine 1° Sub iisdem Cordis viribus Sanguinis motus imminuetur. 2°. Ut in plethorâ pulsus erit solito rarior. Corrigitur per diluentia & attenuantia sed præcipue per auctas Cordis vires unde fluxiliora liquida evadent.

158. Ex fluxilitate nimia, 1°. Facilius Cor ab iisdem viribus contrahetur undè ut prius (156) pulsus erit frequentior, solitâ Cordis contractione citius absolutâ. 2°. Ob eandem circiter emissam molem altitudo pulsûs non mutabitur. 3°. Augebitur circulationis velocitas. 4°. Et inde augetur calor nisi compensaret, forsan & ultra requisitum, ipsius imminutio ratione minoris consistentiæ. 5°. Ob faciliores excretiones brevi minuetur Sanguinis copia, suaque afferet symptomata. 6°. Ex vitiatâ Sanguinis crasi minus aptus erit virium reparationi, inde minuentur Cordis vires, simulque motus, affricus & calor. In crassantibus corrigitur hæc dyscrasia. Sed frequentius peccat Sanguis copiâ quàm defectu, viscositate quàm fluxilitate ut docet historia morborum.

## ART. II. De robore vasorum aucto & imminuto.

159. Vires nostræ suos limites habent repetendos, 1°. Ex eo quod potentia animæ motrix certam tantum vim exercere possit juxta summæ Numinis decreta. 2°. Ex eo quod potentia motrix non in quamcunque corporis partem imperium exercent, sed in illam tantum quæ Physiologi fluidum nerveum, vel spiritus animalis nuncupatur. Qui si deficiat potentia motrix non amplius exercebitur, si minori copiâ adsit debiliter tantum peragentur motus. 3°. Nulli motus à potentiâ motrice exercentur absque hujus fluidi consumptione, brevi igitur fatiscerent vires, nisi pars fluidi nervei amissa continuo repararetur. 4°. Hæc reparatio suos habet limites, ita ut dato tempore data tantum fluidi nervei quantitas secernatur. 5°. Si igitur tales sint motus ut fluidi nervei jactura ipsius reparationi sit æqualis, vires integræ quidem manebunt sed à minimo excessu infringentur. Si jactura superet reparationem, vires continuo imminuentur. Si jactura minor sit reparatione, quod in statu sano evenit, exuperans servabitur copia ad motus insolitos absque

virium



virium necessariorum detrimento peragendos. 6°. Sed per aliquod tantum tempus fluidum nerveum incorruptum servari potest, ita ut auxiliaris hæc copia non ultra certum gradum increseat.

160. Has Leges in fluidi nervei distributione Potentia motrix sequi videtur. 1°. Quamlibet functionem minimis fluidi nervei impensis exercet, ita ut motus non ultra necessitatem augeat. 2°. Deficiente fluido nerveo quantitatem requisitam quantum potest motibus circulatoriis impertitur. 3°. Manente solitâ fluidi nervei quantitate si augendus sit notabiliter circulatorius motus tantundem imminuitur voluntarius.

161. Cordis Vires ob quamcunque rationem auctæ hæc nova in Circulatione afferent. 1°. Per vehementiorem contractionem fibrarum dilatantium capacius evadet Cor in dilatatione, majoremque Sanguinis copiam recipiet. 2°. Per contractionem fortiolem fibrarum constringentium majorem sanguinis copiam dato tempore exprimet. 3°. Pulsus augebitur vel in altitudine vel in frequentia vel in utraque. 4°. Augebitur Sanguinis motus & circulationis velocitas. 5°. Intendetur pariter Calor unde falsa Plethora. 6°. Sanguinis partes comminuentur & sero non deficiente fluxilitas conciliabitur. 7°. Si diu duret hic labor succedet debilitas magna viribus exhaustis.

162. Imminutis Cordis viribus opposita observabuntur Phænomena, ut patet per contrariorum rationem. Cumque ex debilitate tantum imminuantur, simul erit virium muscularium maximus languor.

163. Nimis auctæ Cordis vires, sæpeque funesti ipsarum effectus corrigentur per imminutionem massæ sanguineæ, inde enim (156) minuuntur sanguinis motus & calor efficacissime. Imminutioni Virium utcumque medentur Cardiaca optimique succi alimenta, unde patet facilius eas minui quam adaugeri posse.

164. Aucto Vasorum sanguiferorum tono 1°. Rigidiora evadent. 2°. Fient strictiora minoremque fluidi molem continebunt, cum fluidior pars subeat lymphatica chylusque minus liberè appellat. 3°. Sanguis erit crassior & globulis rubris ditior ob feri defectum. 4°. Difficilior erit multò transitus ex auctis affricibus, majorque offeretur Sanguini à Corde emissio resistentia. Indè si vires Cordis eadem maneat minor quantitas dato tempore exprimeretur, retardabitur circulatio, rarior erit pulsus &c. ut in senibus observatur. 5°. Sed si Cordis vires simul intendantur ut Junioribus solemne est, poterit eadem Sanguinis emissio copia tempore dato. 6°. Sic velocitas Sanguinis erit solito major ob alvei angustiam. 7°. Calor increseat ex hac velocitate, ex tensione majori & ex spissiori Sanguine. 8°. Pulsus erit solito altior ob auctam rationem Sanguinis à Corde emissi ad copiam in Arteriis inclusam. Simul erit durus &ensus.



165. Imminuto vasorum tono, 1°. Erunt laxiora. 2°. Ampliora. 3°. Ob minorem Sanguini à Corde emissæ resistantiam oblatam major quantitas dato tempore exprimeretur. 4°. Sed hæc laxitas generalem arguit debilitatem, sunt igitur Cordis vires simul imminutæ, & proinde non major Sanguinis copia ab ipso exprimetur. 5°. Imminuuntur consequenter Sanguinis motus & calor. 6°. Pulsus erit mollis. 7°. Grumofus fit Sanguis, & malè mixtus, per languidam enim circulationem globuli rubri magis ab invicem attrahuntur.

166. Tonus vasorum auctus per laxantia & emollientia curatur. Imminutus per roborantia & modicum exercitium.

167. Quandoque debilitas uni loco peculiaris est, tuncque debilis pars pressioni laterali magis cedit & extrâ libellam vasis attollitur in tumorem qui in venis Varix in Arteriis Aneurisma nuncupatur. Pulsat Aneurisma non Varix, ob eandem in hâc omni tempore lateralem pressionem & ob diversam in illo. Quod fusè fuit explicatum ( 61. 62. ) Curatio in eo versatur ut lateralis pressio minuat per Sanguinis imminutionem, & resistantia vasis augeatur per corroborantia & duri corporis applicationem, quæ si inutilia sint, ad Chirurgiam recurrendum erit.

### ART. III. *De circulatione inæquali & humorum raptu ad certas partes.*

168. Hucusque consideravimus Arterias ut vasa quidem flexilia, sed eandem semper inter se proportionem servantia in quocunque dilationis & contractionis puncto. Perpendimus vitia humorum & solidorum generalia, quorum ratione generales etiam fiunt in totâ Circulatione mutationes, augentur vel minuantur ubique motus calor pulsus & tensio. Suadet ratio vitium dari posse peculiare in paucis tantum vasis tuncque sufficere correctionem peculiarem in illâ parte, præsertim si sit minimæ extensionis & reliqua fluidorum moles adhuc intacta. Demonstrat tandem observatio plurimas reverâ turbas in remotis quibusdam vasorum locis accidere calorem, pulsus & tensionem ibidem augentes, dum tamen tranquillè generale Circulationis negotium peragitur. Dantur ergò in Circulatione Sanguinis inæqualitates, dum in certis partibus mutatur reliquis interim omninò intactis.

169. Frequenter observantur rubor & calor in unâ parte, dum aliæ in consueto versantur statu imò quandoque pallent & frigent. Rubor autem majoris copię Sanguinis in parte præsentiam arguit, quod duplici tantum ratione fieri potest 1°. Majori copiâ per Arterias advectâ. 2°. Minori revectâ per Venas, obstaculo redditui posito. Sed in hâc pos-



tremâ juxtâ omnes hydraulices regulas imminuerentur affricus & calor, qui in allato casu intensiores observantur. Prima igitur ratio potius admittenda est scilicet Sanguis majori solito copiâ per Arterias ad partem advehitur, undè rubor & calor sequi debent; & è contrâ parcius ad pallidas & frigescentes partes defertur. Fit itaque de facto raptus seu translatio Sanguinis ad certas partes in quibusdam circumstantiis. Sic in verecundiâ rubet & calet facies, pallent & frigescunt extrema, revulsione ab extremis partibus & derivatione ad caput factâ.

170. Jam verò certum est rationem quantitatum Sanguinis diversas Arterias subeuntium mutari non posse à vi Cordis mutatâ; pari etenim modo in omnes Arterias agit, nec transfluxuum proportionem turbat. Sed non aliter intelligitur Arteriam unam majorem quantitatem fluidi proportionaliter accipere, quàm 1°. Imminutâ resistantiâ appellenti Sanguini oblatâ, vel 2°. Ampliato canali. Ex imminutâ resistantiâ quantitas Sanguinis in parte non augetur, ut in nostro casu evenit, remanet ergo ut Arteriæ ampliatio mutata fuerit, & superest explicandum quomodo peculiare illæ mutationes in Arteriis fieri possint.

171. Musculosam in Arteriis dari tunicam cujus ope diversi motus peragi possint, docet Anatome; cùmque Deus nihil frustra faciat, non inutiliter ibi posita fuit; vis simplex elastica muscularem apparatus non requirebat. Sed ut ipsius actio per factum ipsum demonstraretur, inferatur digitus in Arteriam vivi Animalis, & fortiter constrictus sentietur vi verè musculari, cum vitâ desinente, nec pendente à distensione per immissum digitum factâ.

172. Cùm igitur in aliquâ parte spasmodicè contrahet Arteriarum fibras orbiculares potentia motrix, imminuetur alveus & consequenter minor quantitas Sanguinis cæteris paribus recipietur, imminutâ etiâ pulsûs ampliatione transfluxus Sanguinis erit minor, partes quibus inservit Arteria constricta parcius irrorabuntur, indè frigus, pallor, pulsûs imminutio quæ tunc observantur. Imò talis esse poterit contractio, ut auctis etiâ Cordis viribus, solito minor quantitas Arteriam subeat. Vehementiori huic spasmo ut vehementiori cujuslibet muscoli contractioni succedunt debilitas & relaxatio, quod imprimis notant Hoffmannus aliique Germanorum celeberrimi, in hypocondriacis præcipuè & hysterice affectibus.

173. Si verò Arteria contrahatur altiùs in suâ Systole, simulque relaxetur in Diastole, tunc & magnam dilatationem & altam contractionem patietur; sicque ex duplici causâ, augebitur Sanguinis transfluxus in arteriis ab ipsâ ortis; hinc pulsus, rubor, attritus & calor in irroratâ parte necessario intensiores evadent. Ita concipitur modus



quo Circulationis inæqualitates produci possunt.

174. Ratum igitur statutumque maneat ex Creatoris summi sapientiæ factum fuisse ut particularibus malis particularia opponerentur auxilia, sic v.g. leves in unâ parte obstructions per auctam ibidem parvis viribus Circulationem faciliè tollentur, majori Sanguinis copiâ impetente; quæ si ex generali tantum totius Circulationis incremento tolli potuissent, minùs efficaciter, maximisque impensis viribus superarentur, dum in debilioris constitutionis Homínibus continuæ ferè requirerentur in Circulatione mutationes. Absque potentiâ motrice Circulationis inæqualitas nullatenus intelligitur.

#### ART. IV. *De Hæmorrhagiis naturalibus.*

175. Sæpiùs observatur in morbis criticas Sanguinis evacuationes maximo cum ægri levamine ab internâ causâ produci, præcipuè è naribus & hæmorrhoidalibus Venis, quandoque è pectore, menstruum fluxum omittendo generationi peculiariter dicatum. Causa autem proxima omnis hæmorrhagiæ est Sanguinis pressio vasorum cohæsionem superans, pender ergò 1°. Ab auctâ Sanguinis pressione. 2°. A debilitate vasorum. Si cætera igitur paria sint in debiliori vasorum parte fiet ruptio & hæmorrhagia.

176. Duplici modo augetur pressio lateralis, 1°. Auctâ vi totali Sanguinis transfluentis. 2°. Difficiliori transitu facto. Altera hæc causa non negligenda est in extremis vasorum finibus qui in hæmorrhagiis lacerantur, ibi enim propter parvum trans Venas affrictum lateralis pressio in sano statu parva est & vi totali multò inferior, unde notabiliter augetur cum obturato vase vi totali evadit æqualis. Sed ex alterâ parte confitendum erit vim totalem minimam esse in ultimis vasculis, indeque ad hoc ut lacerentur requiri ipsius incrementum, quod fiet per explicatam Circulationis inæqualitatem.

177. Hæmorrhagia minuit efficacissimè Sanguinis copiam nimiumque ipsius impetum, nullum igitur præstantius erat in Plethorâ auxilium. Inde in sanguineis etiâ absque morbo declarato identidem talis evacuatio celebratur. Imminente autem fluxu, manifesta sunt signa derivationis Sanguinis ad crepatura vasa, sic in hæmorrhagiâ narium Sanguinis raptus ad superiora, revulsio ab inferioribus evidentes sunt. Algent enim plerumque pedes dum gravatur caput, rubet facies, turgent jugulares, vehementiùs micant carotidum rami. Erupto tandem sanguine brevi omnia ad solitum æqualitatis statum redeunt, cessat capitis gravitas, & liberior ubique fit Circulatio.



178. Non semper adeò feliciter succedunt Naturæ conamina, quandoque enim ob nimiam vasorum resistantiam nullus producit fluxus, pravaque oriuntur à nimia Sanguinis derivatione symptomata, quandoque majori vase aperto nimia cruoris copia effunditur; fit etià ut consueto exitu denegato in debiliorem aliam partem feratur Sanguis, v. g. in Pulmones, ubi levamen per hæmoptoën conciliatum, periculum ulceris vix curabilis post se relinquit. Verùm sapientis erit Medicinaturam aberrantem corrigere, sister per adstringentia nimium fluxum, minuetque per artificialem hæmorrhagiam Sanguinis copiam, si vel insufficiens fuerit Sanguinis effusio, vel in teneriori parte cum periculo eam fieri debere prævideat.

**ART. V. De Hæmorrhagiis artificialibus, speciatim de Venæ sectione.**

179. Potentissimum exhibet in diversis morbis auxilium Sanguinis missio per Venæ sectionem facta, quo nullum est in praxi medicâ usitatus; non parva mala ex ejus abusu sequi possunt, tamen quod sanè dolendum de generalibus etià ipsius effectibus apud omnes Medicos nondum convenit, dum alii illam simpliciter evacuatoriam esse contendunt, alii verò præterea & derivatoriam & revulsivam. Nec tantum observationibus Practicis, verùm etià ratiociniis & principiis hydraulicis sibi invicem repugnantibus oppositas sententias adstruunt; operæ igitur pretium erit paulò fusiùs hæc omnia perpendere.

180. Antè Venæ sectionem comprimuntur per fasciam Venæ partis in quâ celebranda est, unde Sanguinis motus inter extrema & ligaturam in Venis, & in Arteriis partis ad Cor usque retardatur, quod sensibile non erit si ligatæ Venæ minimam alvei sanguiferi partem constituent, ut revera per crassiorem hanc computationem patebit. Unius lateris iliaca octavam circiter partem constituit totius sectionis alvei sanguiferi in ejusdem ordinis ramis institutæ; cùmque Venæ superficiales tantùm paucæ in pede per ligaturam constringantur dum internæ liberæ sunt binis ossibus & Achillis tendine defensæ, potest sumi eas octavam ad summum partem Venarum ab iliacâ oriundarum constituere, id est ad summum unam 64 partem totius alvei sanguiferi, sectione in ejusdem ordinis ramis institutâ. Hinc unâ tantùm 64 parte Sanguinis in aortâ motus retardaretur quod negligi potest, & eo quidem magis quod ex aliâ causâ acceleretur ille motus; scilicet ligatæ Venæ sanguinem suum non amplius in truncos effundunt, inde appellenti sanguini ex collateralibus venosis ramis minor offertur resistantia in iplis accele-



ratur Sanguinis motus ut & per congeneres Arterias usque ad Cor. Undè jure concluditur motum Sanguinis cordisque contractionem non mutari per ligaturam quæ paucis momentis ante Venæ sectionem applicatur.

181. Apertâ Venâ pro magnitudine orificii quantitas Sanguinis dato tempore effluentis erit vel æqualis quantitati quæ per ligaturam sistitur, vel major, vel minor, in primo casu non mutabitur Sanguinis fluxus per congeneres Arterias, in secundo augebitur, in tertio minuetur. Majorem autem per orificium Sanguinis copiam effluere quàm quæ per ligaturam sistitur sic facillè patet. Ex apertâ saphæna in 64 Cordis pulsationibus 5 ad minimum unc. Sanguinis emittuntur; jam verò cum quâlibet pulsatione trans compressas Venas una 64 pars Sanguinis à Corde quavis Systole emissi transmitteretur quod similem partem totius alvei constituent (180) evidens est in 64 pulsationibus quantitatem æqualem copię à Corde in unâ Systole emissæ transnare nempe unciam unam & semiss. (93) major itaque Sanguinis quantitas ex apertâ Venâ quam ex eâdem clausâ iisdem temporibus effluit, quod similiter accidet in Arteriâ congenere. In aliis Venis idem pariter fieri, facillè ex similibus computationibus deduceretur.

182. Sanguine sic liberius per congeneres Venæ sectæ Arterias transmissio, evidens est augeri ipsius velocitatem actualem à parte usque ad Cor, eò minùs quò remotior ab aperturâ locus est, ob ampliorem alveum & eandem fluidi copiam præter solitum tranantem. Sed inde adaugeri velocitatem per collaterales ramos vi Cordis & Arteriarum eâdem remanente omninò absurdum est & omnibus hydraulices legibus contrarium. Nam Sanguinis vis per actualem velocitatem auctam non intenditur, sed ex solâ velocitate fluidi liberè tranantis, quæ hic nullatenus aucta fuit æstimanda est; nulla est igitur ratio incrementi velocitatis in collateralibus ramis, nulla fit in ipsis derivatio durante Sanguinis missione.

183. Quid autem de revulsione statuendum erit? Ex hydraulicis notum quòd si in infimâ parte receptaculi constanter pleni, seu in quo vis fluidi semper eadem est, plura sũt foramina, non mutat unius apertura vel obturatio liquidi fluxum in reliquis. Sed si fluidum impellatur vi uniformi trans ramosum tubum cujus crescit alveus, nec maxima sit vis pellens, apertis remotioribus ramis tantam fluidi copiam effundere poterunt, ut cesset alvei totalis plenitudo quæ antecedenti resistentiæ solummodo debebatur, & inde minui poterit in proximioribus liquidi minori tunc vi propulsi transfluens copia, eoque major erit hæc revulsio quo collateralis ramus fuerit aperto tubo vicinior, cum ibi plenitudinis defectus maximus sit.



184. Si igitur fiat in humano Corpore per Venæ sectionem eadem manente vi cordis aliqua revulsio fiet maximè in locis Venæ sectæ proximis, non in remotis ut vulgò statuunt. At quicumque attendet ad elasticitatem vasorum quæ deficiente etià fluido statim constringuntur, confitebitur facile quòd exceptis casibus paulo copiosiorum Sanguinis missionum, vel frequentius intrà paucum tempus repetitarum in reliquis la sanguinea semper plena remaneant præsertim Aortæ initio indeque revulsionem à remotis partibus statui non posse.

185. Ex hydraulicis itaque evidentissimè demonstratur, quod eadem Cordis & Arteriarum remanente, nulla fieri possit ad partes Venæ læ vicinas Sanguinis derivatio, nulla à remotis revulsio.

186. Num ergo tot celebrium in arte virorum opinionem de revulsione derivatione abjiciemus? Num censebimus in re quotidianæ experientia tot sæculis subjectâ, tam crassum errorem à Neotericis præsertim Autoritati minus tribuentibus admitti potuisse? Minimè, sed debitâ verificatione ipsorum praxim suspicientes, aliâ viâ revulsionis & derivationis explicationem tentabimus, recordati hominem non esse merè corporeum, non esse machinam simplicem sed animatam, & spiritali motu potentiâ præditam, ut prius demonstratum fuit. Sine hoc principio nullus est hydraulices regulis vel leviter instructus qui derivationem revulsionem admittere possit.

187. Credimus igitur motum Cordis & Arteriarum diversimodè mutari posse & durante Venæ sectione & post ipsam. Quoad revulsionem duplici modo concipitur, 1<sup>o</sup>. Imminuuntur Cordis vires durante V. Sione, cepto plethoræ casu, à minori copiâ Sanguinis Cordi suppeditatâ, inde vilius truditur per omnes Arterias fitque generalis revulsio i. e. solito minor copia ab omnibus Arteriis recipitur & consequenter Venâ in pede tantâ minor quantitas in carotidas ascendet & liberabitur caput. 2<sup>o</sup>. Potentia motrix infarcta vasa fortius contrahet ut fluidum exuperans recentia nunc imminutâ alibi propellatur. Inde non mirum si durante huc Sanguinis missione illa revulsio sese prodatur per subitam quandoque cessationem doloris capitis, delirii &c.

188. Ut intelligatur derivatio observandum est proprium esse potentie motrici ut motus editos mirâ cum facilitate ad minimam occasionem repetet. Sic versuum serie memoriæ insculptâ, vel horum unus fortuito veritus determinat mentem ad totam seriem reminiscendam, quod non nisi succussis per motricem potentiam juxta certum ordinem ceteri fibræ ideas illorum sonorum repræsentantibus. Musicus sæpius ex illam cantilenam plectro iterum cum mirâ celeritate repetet, juxta acquisitum ordinem absque cogitatione diversimodè per motricem po-



rentiam motis digitis. Et in morboſo ſtatu quàm facilè iterentur ad minimum frigus vel aliam quamcumque occaſionem motus febriles, quorum plurimijam paroxyſmi defecerant, docet Sydenhamus qui diebus horiſque paroxyſmalibus omnem talem occaſionem vitare ſcrupuloſè jubet. In iſſis etiàm ſanguineis evacuationibus mira conſuetudinis effectuum reperiuntur exempla; imminutà enim per Vſonem plethorà; ſapè non minùs poſt paucos dies ſuccedunt menſtruus fluxus, hæmoptyſes, narium hæmorrhagiæ. Imò qui Vſonibus certà anni tempeſtate aſſueti ſunt, ſolito tempore ſi deficient Sanguinis raptum ad hæmorrhagiam producendam tunc patiuntur & quandoque dolores ac ſpaſmos circa ipſam Venam aperiri conſuetam: Obſervant Germani quibus periodicæ Vſones familiares ſunt.

189. His poſitis mirum non videbitur evacuationem ſanguineam in aliquà parte conſeſſam iterum à potentià motrice per eandem viam tentari, ſi nimis adhuc vaſa repleta ſint; optimèque concipitur cur derivatio non in ipſà Vſonis celebratione fiat ſed aliquot tantùm poſt horas quandoque poſt unam aut alteram diem; quod evidentiffimè cuilibet præjudicatis opinionibus non excæcato oſtendet, illum inſolitum derivationis motum neutiquàm deberi reſiſtentia in Venà ſectà imminutæ jamdudùm enim, per clauſam Venam in integrum reſtituta eſt & aliquot tantùm inſtantibus minor fuit.

190. Sequitur ex dictis derivationem non ſemper poſt Vſonem accidere, ſed in eo tantùm caſu in quo ad evacuationem iterandam potentia motrix determinatur, ſi nempe Sanguis adhuc in vaſis exuperet. Hinc planum fit hoc phænomenum non aliter intelligibile, jugularis ſectionem capiti adeò periculofam eſſe ſi initio morbi celebretur, tam utilem ſi prius per alias Vſones magna Sanguinis quantitas educta fuerit; tunc enim nullum eſt derivationis periculum & efficaciffima revulſio ea eſt quæ fit in proximioribus vaſis; ita ut ſolum derivationis ſequuturæ periculum revulſionem in propinquo loco fieri vetet, quod ceſſat depletis ſufficienter vaſis.

191. Evacuatoriam eſſe Vſonem omnem evidens eſt, & effectus exinde obtinendi ex præcedentibus (*Art. 1.*) ſatis patent. Efficaciffimum eſt remedium in plethorà & in auctâ Circulatione, cautè tamen adhibendum Arteriotomia in generalioribus effectibus cum Vſone convenit. Hirudines Sanguinem lentius educunt ſolitamque Sanguinis diſtributionem minùs turbant.

#### ART. VI. De Obſtructione & Inflammatione.

192. Sanguis in minori motu ſpiſſeſcit & à diverſis cauſis coagulari poteſt;



potest; minimi tunc ipsius grumi in ultimis arteriis facile sistentur & illas obstruent; quod si in pluribus simul accidat, circulatione impedita pars in putredinem brevi labetur, nisi potentia motrix promptum afferat auxilium. Pone etenim Cor & Arterias vi merè mechanicâ moveri, in ipsis hæc observabuntur juxta leges ab omnibus hydraulicis receptas, 1°. In obturatis Arteriis sistetur fluidum, pressio lateralis fiet subito vi totali æqualis, tunicæ paulo magis extendentur. 2°. In apertis ramis ob præcedentem vasorum repletionem nihil novi accidet, sed fluidum eadem vi trans eadem vasa propulsum solitâ velocitate tranfluet. 3°. In trunco communi partis obstructæ velocitas fluidi imminuetur, minori solito copiâ tranante ratione vasorum obstructorum. 4°. Si notabilis sit obturata partis amplitudo Cor etiâ in suis contractionibus retardabitur. Itaque nedum ullum inflammationis symptoma ex hac obstructione deduci possit, è contrâ motus & calor in affectâ parte imminuentur, brevique exinde auctâ obstructione pereundum erit.

193. Sed auctis per motricem potentiam viribus omnia mutantur. Etenim 1°. Si vitium sit parvum & topicum, generali Circulatione non turbatâ per fortiores trunci arteriosi partis affectæ oscillationes sed successivè intensas, augebuntur vehementer tranantis Sanguinis impetus & copia, inde vi magnâ in obstaculum & in libera vasa impinger, cum partis calore tensione dolore tumore rubore pulsatione quæ omnia facile intelliguntur. 2°. Si universa Sanguinis massa vitata fuerit & ad concrendum prona, vel si ob magnam obstructionem & dolorem periculum maximum urgeat, suppetias ibunt vires Cordis adauctæ, & consequenter accelerato ubique Sanguinis motu symptomata inde oriunda superius jam explicata observabuntur.

194. Sanguinis impetu in inflammata parte sic gradatim adaucto; 1°. Si materia obstructionis minùs cohæreat quàm vasorum parietes, liberabitur via vasis adhucdum integris, fiet resolutio, brevique omnia ad solitum statum redibunt. 2°. Si magis cohæreat, priùs crepabunt vasa quàm tolli possit obstructio, & ad majorem gradum augenda erit vis Sanguinis; inflammationisque symptomata intenduntur. Ex fragmentis ruptorum vasorum & obstructionis materiâ conficietur pus, apertâ cute emittendum. 3°. Si liberatis vasis sanguineis & restauratâ Sanguinis circulatione, impacta sit adhuc materia in lymphaticis vasis fiet Skirrhus. 4°. Tandem si materia obstructionis in corruptionem sit valdè prona antequàm via liberari possit gangrænosa prorsùs evadet, si præsertim vires exiguæ fuerint; hujus contagium per separationem morbosæ partis à sanâ præcavebitur.

195. Prudens Medicus in referendâ obstructione naturam adjuvabit.



in mediis quandoque aberrantem corrigit. Fluidiorem itaque Sanguinem efficiet; nimis auctam circulationem per V. Sones temperabit; omni operâ promovebit resolutionem, cum materia obstructionis absque periculo Sanguini poterit remisceri, suppurationem imminuentem maturabit, pus citò evacuat, gangrænosas partes ferro & igne abscindet.

## ART. VII. De Febre.

196. Definitionem tradere quæ morborum Febris nomine designatorum species omnes comprehendat, non minùs arduum est quàm characterem invenire essentialiẽ & communem omnibus plantis quas eodem nomine generico veteres insigniebant: arbitrariæ enim sunt nomenclaturæ nec à Logicis institutæ, undè sæpe fit ut diversis rebus eadem imponantur nomina. Hanc autem anteponimus symptomaticam definitionem, quæ & universalior & naturalem maximè Febris characterem continere videtur. Febris dicitur adesse cum pulsus seu frequentia seu altitudine major est quàm à præsentì virium muscularium gradu expectaretur.

197. Vulgaris definitio Febris per pulsûs frequentiam cum functionum læsione in eo peccat. 1º. Quòd minùs sit universalis, nam in Febre malignâ etiam vigente, nulla sæpiùs reperitur in pulsu frequentia. 2º. Characterem potius artificialem continet quàm naturalem, ex pulsûs enim frequentia solâ nihil determinatur de Circulationis statu quæ cum hoc symptomate & eadem & minor & major solito esse potest, juxta diversos altitudinis gradus. Verùm admissa definitio non tantum Circulationis absolutum statum comprehendit, sed & ipsius relationem ad musculares vires, per quam optimè innotescit maligna Febris. Simul leviusculæ omnes in circulatorio motu accelerationes, consequenter ad vehementius exercitium ab ipsâ excluduntur.

198. Si igitur videam cum solitâ frequentia majorem altitudinem, vel alterutram notabiliter auctam alterâ parum imminutâ, concludam circulatorium motum intensiorem esse. Si simul vires motuum muscularium eadem remanserint vel fuerint imminutæ, præsentem Febrem facillimè agnoscam. Si etiàm quod rarò accidet, reperiam auctas vires musculares sed simul adhuc magis auctam Circulationem, vel imminutam Circulationem & magis adhuc fractas Vires, statuam Febrem adesse. Hujusmodi æstimationes Physicam tantum *Acribeian* requirunt.

199. Causa Febris efficiens est insolita Virium distributio, quarum majorem solitâ rationem circulatoriis organis impertitur potentia motrix. Causa finalis est circulatorii motûs conservatio, obstructionum eum im-



pedientium destructio, spissi Sanguinis in fluidiorem elaboratio. Causa tandem determinans erit prava quæcunque Diathesis finali causæ opposita, per efficientem causam corrigenda; prætereaque violentiora Pathemata, quibus potentia motrix ut & reliquæ Animæ facultates in actibus suis quandoque perturbatur.

200. Februm intermittens mirè regulares periodos non unicè pendere à determinante causâ statis tantum temporibus certos effectus producente, confitebitur quicumque attenderit exhibita medicamina in determinantem causam necessariò agentia, sæpe tamen solitos Paroxysmorum reditus vix perturbare; nec à notabilibus in regimine vitiis diebus intermissionis commissis, cessatam jam ab aliquo tempore Febrem renovari, quæ vel minimâ occasione datâ paroxysmali die consuetâ horâ reintegratur. Miri prorsus consuetudinis effectus motrici potentiæ ut suprâ vidimus (188) peculiariter adscribendi non parvam lucem hic afferre possent, in reliquis enim nostris actibus ubivis similes periodos mutatis etiam determinantibus causis observamus, v. g. in temporibus somni incipientis & desinentis, in horis comedendi, bibendi, dejiciendi, &c.

201. Phænomenum Febric quasi proprium pulsûs scilicet frequentia difficillimum est explicatu; videtur enim circulationem æquè commodè augeri potuisse per altiores Cordis contractiones quàm per frequentiores, & tamen observatur quod frequentiam potius augeat potentia motrix quàm contractionem, imò quandoque contractionem infra naturalem statum imminutam per frequentiam potius compensat. Quod non omninò deduci potest ex eò quod auctâ vi contrahente, citiùs ad solitum contractionis gradum perveniat Cor, tuncque ex consuetudine stimulo &c. dilatetur, videmus enim nunc magis nunc minùs evacuari Cor in diversâ pulsûs altitudine & consequenter nullus est determinatus contractionis gradus. Neque etiam à virium per auctam frequentiam minori impensâ quàm per auctam contractionem; quidni enim potentia motrix omni tempore virium parcimonix consulens, in plethorâ etiam frequentiam potiùs quàm altitudinem pulsûs intendisset?

202. In virium tenuitate phænomeni rationem reperiri potius posse videtur, quod debilitas frequentiore semper pulsum comitem habeat; sic videmus debiliora Animalia frequentiore pulsum obtinere, in Cane 90ies pulsat in minuto, in Homine 70ies, in Equo & Bove 40ies; in infantibus etiam frequentior observatur quàm in adultis, in convalescentibus quàm in sanis &c. Observamus etiam in virium prostratione, interruptas musculorum contractiones & repetitas continuas faciliores esse. Sic in debilibus ægris respiratio est parva & frequens, potulentorum deglutitio parva est & repetita, manum ad os



nonnisi pluribus repetitis conatibus deferunt, loquela est etiam interrupta: quæ omnia ex hoc unice fluere videntur, quod parva sit virium vel fluidi nervei copia, unde parvâ tantum copiâ in musculos immitti potest, quâ post debilem contractionem impensâ, vi deficiente tempusculo relaxatur quiescitque musculus, donec nova fluidi quantitas secreta fuerit. Ita pariter cum Cordis contractio parum durat, parum alta est, vim novam acquirit potentia motrix per quietem etiam si parvam succedentem, dilatio enim Cordis vera quies est respectu ipsius contractionis. Addere possumus quod longè facilius sit debilioribus magnum pondus ad certam distantiam manibus bajulare, si identidem humi deponatur per breve etiam tempus quàm si unâ vice ad minorem totalem distantiam transportaretur.

203. Notandum est debilitatem relativam esse motibus exequendis; sic auctâ Sanguinis visciditate & intactis viribus, nihilominus minores sunt vires quàm in statu sano.

204. Si naturæ conaminibus obstructions Febrem excitantes feliciter resolvantur, brevi omnia ad solitum statum redibunt; si è contra nimium resistant, exhaurientur tandem vires & peribit æger.

205. Medici autem officium erit, naturam in obstructionibus reserandis adjuvare, materias morbificas Sanguinem inspissantes evacuare, quæ omnia fient per diluentia, cathartica, aperientia, vires sustinere si sit opus jussulis frequentioribus; nimiam agitationem per Venæ sectiones temperare; febriles motus si in consuetudinem conversi fuerint per specifica debellare; diversosque motus febrilem perturbantes excitare.

### ART. VIII. *De Cordis palpitatione.*

206. Cor impetit feritque sinistri lateris costas apice suo tempore Systoles, ut vivi sectiones docent; quod debetur motui recto totius molis juxta Cordis axim in anteriora & motui conversionis apicis Cordis à sinistrâ ad dextram. Motus rectus debetur simultaneæ dilatationi utriusque auriculæ, quâ basis Cordis juxta axim aliquantulum promovetur, motusque conversionis debetur partim dilatationi sinistræ auriculæ, fortius agenti in Cor quàm dextræ dilatio, propter resistantiam à parte Vertebrarum insuperabilem; sed præcipuè debetur immissioni Sanguinis in Aortam, quâ in ampliorem circulum ipsius curvatura erigitur, unde sequitur necessariò conversionis motus, ut cuilibet situm harum partium revocanti patebit. Non absimili mechanismo, uno genu alteri imposito, in pede observatur conversionis ad superiora motus, debitus erectioni Arteriæ popliteæ compressæ & incurvatae quæ fit tempore Diastoles



Arteriarum, copiosius immisso Sanguine.

207. Motus illi Cordis rectus & conversionis vehementiores & frequentiores palpitationem constituunt quandoque tantam ut & ad certam distantiam audiatur, & costæ per ipsam fractæ fuerint. Vehementia motuum Palpitationis pendet ab omni causâ distensionem Auricularum & præcipue Aortæ propè Cor intendente; Ut 1°. Obstaculum in Aortâ positum v. g. tumor, polypus, valvularum semilunarium induratio quod comitabitur pulsûs altitudo minor ob parvam ejecti Sanguinis copiam. 2°. Constrictio Arteriæ spasmodica ut Hypochondriacis accidit. 3°. Obstaculum in Arteriâ pulmonali enatum, undè sæpiùs per consensum constringi potest Aortæ truncus, fiet simul Arteriæ pulmonalis aliqua erectio & auriculæ dextræ dilatatio vehementior, quæ tamen omnia minorem Palpitationem producent; pulsus minor etiam observabitur, ob paucitatem Sanguinis sinistro ventriculo suppeditati. 4°. Valvularum mitralium impeditus motus per ossificationem &c. Unde regressus Sanguinis in auriculas permittitur augeturque ipsarum dilatatio, hanc speciem comitatur adhuc pulsus imminutus. Frequentia verò contractionum in palpitatione pendet ex virium Cordis tenuitate respectivâ, quarum magna pars inutiliter impenditur, in superandis magnis resistentiis vel in trudendo Sanguine in auriculas, si mitralibus valvulis orificia Cordis venosa imperfectè claudantur.

208. Quàm parum possint auxilia Medica in Palpitationibus à pravâ partium conformatione oriundis nemo non videt, levamen afferent repetitæ Venæ sectiones; in Palpitatione verò spasmodicâ, laxantia & Narcotica mirè juvabunt poteruntque curationem absolvere.

## ART. IX. De Pulsibus.

209. Ut methodicè tractentur Pulsus qui maximè momentosam Se-meiotices partem efficiunt, considerandæ sunt, 10. Una pulsatio. 2°. Plures. Una pulsatio expendi debet, 1°. Respectu motûs in quo tria considerantur, spatium percursum, velocitas & momentum. 2°. Respectu qualitatum tactilium. Ex spatio, pulsus est *magnus* & *parvus*, ex velocitate *celer* & *tardus*, ex momento *fortis* & *debilis*. Ex qualitibus tactilibus pulsus est *durus* & *mollis*, *tensus* & *laxus*, *plenus* & *vacuus*.

210. *Magnitudo* Pulsûs maximâ attentione digna est; æstimatur per viam ab Arteriæ parietibus descriptam in unâ ipsius Diastole; pendet unicè ex volumine Sanguinis à Corde præcedenti Systole emissi, videmus enim dimidiam semper hujusce voluminis partem in arteriosâ ex-



panfione recondi (65), non potest ergo crescere aut minui volumen illud quin etiam in eâdem ratione crescat aut minuat. Arteriæ ampliatio, quæ sensibilibiter proportionalis est viæ descriptæ ab Arteriæ parietibus, ob minimam differentiam diametrorum Arteriæ radialis (in quâ Pulsus exploratur) in Systole & in Diastole (71). Est igitur Pulsus magnitudo vel altitudo certissima quantitatis Sanguinis à Corde unâ Systole ejecti mensura, sub quacunque corporis conditione. Sic si duplò major evadat pulsus, duplam Sanguinis quantitatem à Corde emissam fuisse certò concludemus.

211. *Celeritas* Pulsus æstimatur ex velocitate quâ parietes Arteriæ ab axi in unâ Diastole removentur. Sed cum nulla sit Arteriæ quies & uniformi sensibilibiter velocitate moveatur, evidens est sub eâdem magnitudine celeritatem determinari à pulsationum frequentia quæ facilius æstimatur, nihil igitur novi ex Pulsus celeritate ediscitur.

212. Pulsus *fortis* ille est in quo magnâ tantum pressione reprimi potest Arteriæ dilatatio. Demonstrat ergo Sanguinem difficilius tranantem, vel vires Arteriarum Cordisque magnas. Si enim facile tranaret Sanguis, per pressionem externam Arteriæ illatam velocitas ipsius statim augetur unde pressioni cederet. Si etiam Arteriæ debiles essent prementi digito fluidum non resisteret sed in vicinis locis Arteriâ ulterius dilatata facile removeretur.

213. *Durus* est Pulsus qui digitum ferit ad instar corporis duri, magnam habet cum præcedente affinitatem, sed præterea supponit induratos Arteriæ parietes ut in senio observantur.

214. *Tensus* est Pulsus qui digitum ad instar chordæ tensæ percutit, affinis est forti sed arguit insuper tonum & elasticitatem in Arteriarum tunicis majorem.

215. *Plenus* est Pulsus quo judicatur plenior & capacior esse Arteriam; id dignoscitur ex eo quod Arteria in plura tunc puncta feriat digitum juxta suam latitudinem, quo enim major est circulus physicè consideratus eo contiguæ superficiei in pluribus punctis applicabitur ut patet.

216. Si pulsationum series nunc consideretur, potest esse æqualis vel inæqualis. *Æqualis* est Pulsus in quo omnes pulsationes inter se omnino eadem sunt & æquidistantes; indicat uniformitatem motuum Circulationis. Dividitur in *frequentem* & *raram* prout plures aut pauciores numerantur in dato tempore pulsationes, terminus medius est 70 in uno minuto. Frequentia parvitati præsertim juncta indicat quasi specificè debilitatem & functionum turbam, terrorem, &c. Rarus etiam ex summâ debilitate in ultimo agone deprehenditur Pulsus.



217. Pulsus *inæqualis* est vel respectu ipsarum pulsationum quæ ab invicem discrepant, vel respectu temporis inter binas intercedentis 1°. Pulsationes erunt inæquales si una sit reliquis minor vel major, & hic Pulsus vocatur *caprizans*. Prima species indicat fatiscentes identidem Cordis vires, vel obstaculum ipsius evacuationi identidem positum: altera denotat vires in unâ pulsatione quasi convulsivè adauctas, vel liberiores factas ad momentum viam.

218. 2°. Respectu temporis intercedentis, vel retardabitur una pulsatio tuncque Pulsus est *intermittens*, vel accelerabitur & Pulsus *intercadens* nuncupatur. Eadem ferè indicant ac præcedentes, primus nempe deficientes per momentum omninò vires, alter convulsivum in Corde motum.

219. Perlustratæ Pulsuum species diversimodè quandoque in ægris combinantur, sed simplicibus intellectis combinationes faciliè explicari possunt. Nec tantum ut Diagnostica signa sed ut Prognostica Medicæ Praxi inserviunt, sed hæc postrema non rarò fallunt & potiùs ad Morborum Historiam quam ad Theoriam Artis pertinere videntur.

#### ART. X. De Syncope & morte.

220. Cum Cordis vires Circulationi peragenda non amplius sufficiunt, debilitatur admodum Pulsus, pereunt motus voluntarii, pereunt sensus omnes, fit Syncope seu Lipothymia vera mortis imago. Viribus nempe deficientibus, potentia motrix restaurandæ Circulationi residuum impendit omissis voluntariis minùsque necessariis motibus (160) Sanguis quiescens difficiliùs semper moveretur, & novum spiritum animale non secernit, ergò si paulo diutius duret Syncope in mortem terminabitur.

221. Syncopen producent 1°. Virium generalis & absoluta imminutio v. g. per laborem nimium vel per evacuationes maximas, hæmorrhagiam, diarrhæam, sudorem, &c. 2°. Virium generalis & relativa imminutio per resistantiæ superandæ maximum incrementum, ut per Sanguinis inspissationem à coagulante veneno, per Polypum &c. 3°. Virium particularis in Corde imminutio, v. g. per nervorum obstructionem. 4°. Tandem defectus actionis motricis potentiæ, quædam enim sunt quæ motricem potentiam à solitis exercitiis potentissimè abstrahunt ut vividiora pathemata, timor, mæror, &c.

222. Medebuntur in genere quæ Cordis motum citò restaurabunt, ut cardiaca, succussio totius corporis, succussio vasculorum faciei aquâ injectâ, situs horizontalis, & si Sanguis difficiliùs promoveatur Venæ Sectio præstantissimum erit auxilium.



223. Mors est cessatio nexûs inter Animam & Corpus, quâ non amplius in se invicem agunt, nec à se invicem patiuntur. Totus hic nexus in spiritu nerveo repositus fuit juxtâ Numinis Leges (159). Hoc igitur semel prorsûs deficiente, potentia motrix in Corpus agere nequit, nec Corpus in Animam. Fluidi verò nervei continua reparatio in quâ vita posita est, pendet à Sanguinis Circulatione: Hâc igitur omninò cessante cessat & Vita. Pater inde Mortis causas esse eas omnes quæ Syncopen inducunt ad altiorem gradum evectas, & neminem absque Syncope mori.

224. Sanguinis Circulatio vitam ipsam constituit, nullum igitur erat momentosum magis in œconomiâ animali quod seligeretur argumentum, nullum quod in primo Medicinæ limine majori consideratione dignum foret. Operis quidem difficultas viriumque tenuitas à scribendo animum deterrebant, sed à Tyrone ea non expectantur quæ ab Artis Magistris proferri solent. Utinam horum aliquis tam nobile subjectum digniùs & fusiùs tractare susciperet, & ab ipso in eorum gratiam qui veritatem & evidentiam in Theoriâ Medicâ vehementer exoptant, ea omnia explanarentur quæ in Sanguinis Circulatione nondum sufficienter intellecta sunt.

**F I N I S.**